




Early European Books, Copyright © 2011 ProQuest LLC.
Images reproduced by courtesy of The Wellcome Trust, London.
2408/A





Early European Books, Copyright © 2011 ProQuest LLC.
Images reproduced by courtesy of The Wellcome Trust, London.
2408/A



Early European Books, Copyright © 2011 ProQuest LLC.
Images reproduced by courtesy of The Wellcome Trust, London.
2408/A



Early European Books, Copyright © 2011 ProQuest LLC.
Images reproduced by courtesy of The Wellcome Trust, London.
2408/A

2408 A

1-1 xxx

16/5

53.C.19

23809

39

2408/A

Fe/13et
Paris 09

108


23809

PETIT TRAITE
CONTENANT VNE DES
PARTIES PRINCIPALES
DE CHIRURGIE,

Laquelle les Chirurgiens hernieres ex-
cercent, ainsi quil est montre
en la page suiivante.

Fait par Pierre Franco chirur-
gien de Laufane.

Il faut endurer pour durer.



A LYON,
Par Antoine Vincent,

M. D. LVI.

Des v i i i. especes des Hernies , & des
accidens qui leurs suruiennent.

De la pierre en la uessie.

De la cure de cataracte.

De ungula.

Des bouches & leures fendues.

De la maniere d'extirper une iambe ou
bras.

Des luppies, & des autres absces flegma
tiques.

A MES TRES REDOV-
TES ET PVISSANS

Princes, & Senat de Berne,

Pierre Francoreshum

ble Salut.

LA mesme cause qui m'a induit à escri-
re cetracte, m'a aussi esmeu à le vous
dedier, Princes tres magnifiques. Voiant
toutes les autres sciences & artz auoir este
deliures des profondes tenebres, esquelles
elles auoient esté enuelopeez si longtems, &
remises en autant bon ordre cōme iamais
par la diligence, & le labeur des gens sca-
uans: Et neanmoins que ceste partie de chi-
rurgie tant necessaire pour la conseruation
de l'homme n'estoit expressement traitee
d'aucun, combien qu'elle meritast pour son
utilité d'auoir un liure à part: Le me suis
mis à en escrire le plus simplement & à la
uerité que iay peu. Ce toutes fois que ie nay
voulu entreprendre de mon propre cer-

A 2

E P I S T R E.

ueau, encores que ie viffe la grād neceſité,
 & les meurtres qui ce ſont commis & ſe cō
 mettent iournellement par ceux dudit art,
 qui oſent pour la plus part ſans aucune con
 ſcience entreprendre de guarir toutes ſor
 tes de maladies: Mais ay eſtè requis par
 gens excellens en la medecine, de rediger le
 tout en un petit liure, à fin d'aider aux i
 gnorans, & reprimer l'arrogance de ces pi
 peurs, laquelle ne merite point moins d'eſtre
 punie par le magiſtrat que les guetteurs de
 chemins, voire d'autant plus que ſous l'om
 bre de donner aide, ilz tourmentent & ſont
 miſerablement mourir les pouures patients.
 Cōbien que n'ay point eu tant d'eſgart à deſ
 couvrir leurs cruantes & larcins, qu'al' u
 tilité publique & proffit de ceux qui excer
 cent fidellement le dit art, & ne faillet que
 par ignorance. Or la difficulté de l'œuvre, &
 les nouvelles experiences que i'auois de iour
 en iour des maladies, & leſperance auſſi
 que i'auois que quelcū plus expert & mieux
 verſe

EPISTRE.

*Verſe en ceſte partie de chirurgie que moy:
y miſt la main, m'ont retardé de ne point ſi
toſt ſatisfaire à la requeſte de mes amis. Et
de fait ie craignois de mettre en lumiere ſe
liure: preuoiãt les calōnies des detracteurs
leſquelz voudroient que les bōnes ſciences
demouraffent touſiours enſeuelis, pour leſ-
quelz toutesfois ie n'ay eſte refroidi de pour-
ſuiure mon entrepriſe, eſtimant que ſi quel-
cun en meſdit, il ſe declarera aſſes à tout hō
me de bon iugement eſtre enuieux du bien
public, & mené de pure ambition. Et pour
cela (tres redoutez ſeigneurs) iay prins la
hardieſſe de vous adreſſer ce mien petit la-
beur, & le faire publier ſous la proteſtion
de voſtre Maieſte, combien que ie ſcache
que la choſe ne parangonne point à voſtre
hauteſſe: Mais ayant cōgneu la faueur que
vous portes à toutes gens de letres, & la
charité meſme de laquelle vous uſes en-
uers les malades des maladies dōt les guai-
riſons ſont icy contenues, ie me ſuis perſuadé*

EPISTRE.

que vous prendries le tout en la bonne par-
tie, comme de celui qui est prest d'un cou-
raige prompt s'emploier entierement
à vostre service. Nostre Siegneur
vueuille conseruer vostre puis-
sance, & vous augmenter
ses graces pour maitenir
sa verité, & gens
de bien en vo-
stre prote-
ction.

Au lect



I

Au Lecteur.

IE ne doute point (Ami lecteur) que quelques uns n'estiment ce mien labeur estre superflu, ueu quil semble que ceste matiere ne merite point un liure à part: & quilz ne me iugent par trop hardi, dautant que gens fort excellens en medecine en ont escrit. Toutesfois i'espere qu'ayant congneu les causes qui mont incité à ce faire, ilz ne trouueront le fait trop estrāge, ains louable, & digne d'un chrestien. Or ne puis-ie nier que l'ignorance & malice de plusieurs gens de nostre art, n'ait donné occasion de mespriser ceste partie de chirurgie, à raison que sans aucune crainte de Dieu, ni des hommes (encores quilz congneussent leur ignorance) ont ose entreprendre de guairir toutes fortes de maladies, moiennāt qu'ilz pensent auoir argent: Et ce au grand dommaige des pouures patiēns, lesquelz (apres les auoir affrōtez) ilz ont

9 fait miserablement mourir : tellement qu'à bon droit les medecins, & autres les appellent coureurs & abuseurs. Je me tay des larcins & superstitiōs infinies, qui se commettent par la plus part, cōme de ceux qui outre le marche fait, quand ilz s'en vont emportent un linceul pour les hernies, une nappe pour les pierres, & une seruiette pour les catarractes, & treize liardz ou blācz pour treize pouures, afin d'entretenir les bonnes coustumes, comme ilz disent. Toutesfois selon le pais ilz font, regardant aussi à qui ilz ont affaire & selon leur fantasie. Et neāmoins telle malice & ignorāce ne doit estre cause qu'une chose tāt proffitable & necessaire soit obscurcie & mesprisée. Car ie puis dire à la uerité qu'ētre toutes les parties de chirurgie (desquelles ie fay profession) il ni en a une de laquelle on se puisse moins passer que de ceste cy, considērāt les grās inconueniēs qui arriuent iournallemēt au coprs humain, ausquelz
on

on peut remedier par le moiẽ de cest art. Quant à ceux qui par ci deuant en ont escrit, il est uray que gens scauãs en ont parlé mais c'a este cõme ilz l'ont entẽdu, & de telle sorte, quil est fort difficile pou uoir mettre la main à l'œuvre sans autre ay de que des liures. Et mesmes ilz n'õt pas peu tout escrire, cõme de fait un esprit, pour excellent quil soit, ne peut comprendre, ni experimenter toutes choses: & n'ayant ueu plusieurs experiences apres eux faites par gentz dudit art. Parquoy i'espere qu'on trouuera en ce liuret choses touchant ledit art, qu'on ne trouuera point ailleurs, lesquelles i'ai cõgneues par l'experience que i'en ay fait depuis trente ans en ça, aiant inuẽté quel que maniere de proceder, que toutes gẽs de bon esprit trouueront plus expedientes & moins dangereuses que celles desquelles on a usé iusques à present. Or cõme ie me suis efforcé de ne riẽ obmettre que i'aye esti mé utile à la pratique

A 5

de ceste partie, aussi nai-ie uoulu escrire
que ie nay plusieurs fois experimenté.
Ce que i'ay fait le plus briefuement que
iay peu, & avec plus grande simplicité
de paroles que faire ce peut, ainsi que la
matiere le requerroit, laquelle d'ellemes
mes ne demande point d'estre fardee.

Et pourtant que ie me suis accommodé
à ceux pour lesquelz principalement
iay escrit ce liure, iay esté contraint de
repetier souuētesfois des motz, quelque
fois des sentences toutes entieres, qui
est la cause pourquoi le stile sera estimé
lourd & rude. Mais iespere que la faute
me sera facilement pardonnee de ceux
qui s'arrestent plus à la chose qu'à l'elo-
quence des paroles. Si donc ie congnoi
(Ami lecteur) que ce mien labeur t'ait en
aucun endroit proffité, ie m'efforcerai
ci apres d'en escrire plus au long. Que
s'il ne t'est en rien agreable, au moins
pren enuie d'en faire dauantaige: Et lors
ie m'estimerai auoir receu grād fruit de
mon

mon labeur, quand ie t'aurai stimulé à en
escrire plus amplement & en meilleur
ordre. Dont ie suppli le Createur uou-
loir heureusement conduire l'œu-
re tellement que le tout soit
à son honneur & gloire.

Des par



La maniere de viure laquelle les bleffes doiuent tenir iusques à sept iours.



L ne suffit pas d'auoir bien procede es choses dessusdittes, mais il faut aussi se donner garde quil ne suruienne fieure ou inflammation au patient. Ce que pourroit facilement aduenir tant à cause de l'apprehension dudit patient, que de la douleur de la partie. Parquoy durāt six ou sept iours il faut que sa maniere de viure soit tenue, *et* froide, *et* humide, principalement si l'homme est ieune ou replet, ou si la disposition de l'air est chaude. Il faut dōques qu'il s'abstienne de vin. Et sur tout sil y a desia fieure ou inflammation, quil ne mange point de pain mal cuit, ou mal leué, de frommaige viel ni salé, de fruitz, d'aux, d'ognons, de moutarde, de salure, espiceries, de toutes sortes de legumes, de laitage, de chair de dure digestion, *et* de trop grand nourrissemēt, comme de beuf, lard, de veneson de grosse beste

bestes &c. Pareillement de poissons qui sont de dure digestion, comme d'anguilles, marsoin, & leurs semblables. Et faut quilz boient de ptisane faite avec de la rigalisse & d'orge, en y meslant qui voudra du syrop violat. Ilz pourront aussi boire d'eau boulie en y trempant du pain bis de fröment. Ou s'ilz sont vieux ou debiles, ou quilz soient trop accoustumez au vin, on leur pourra donner à boire quelque petit vin bläc, principalement quand il ny a point fieure, ne inflammation, en y mettant de leau. Ilz pourront user d'orge mödé, d'aunenat, de lait de amāde, de pouletz, perdrix, petis oiseaux, & vallent mieux boullis que rotis, en mettant au potage de bourrage, de laitues, deffinars, de pourpie, & les semblables. Toutesfois ilz pourront bien user des dessusdittes choses roties, moyenāt qu'elles soient alterées avec d'eau rose. Ilz pourront aussi user du potage fait avec les herbes dessusdittes, auquel on pourra detremper des œufz quand il ni aura point cuit de chair. On y pourra faire cuire

cuire aussi du mouton ou cheureau. Et pourront manger des poissons qui sont de facile digestion, & qui ne se corrompent facilement en l'estomac, comme de soles, de brochets, de truites, de perches, d'amble, de romb, & autres semblables, en les faisant cuire en l'eau, puis les mègeant avec du beurre frais, & du verius, ou du ius d'oseille. Ilz pourrôt aussi user d'œufz pochés en leau avec du verius, ou du ius d'oseille, semblablement descreuissés. Et de toutes ses choses en petite quantité. Ilz se garderont autant quil sera possible de se bouger, car il est fort dangereux, & le repos leur est fort bon. Toutesfois s'ilz se fachoient par trop d'estre tousiours sur un costé, ilz pourrôt se retourner doucement de lautre, quand c'est incontinent apres l'incision, moiennant qu'on ne le cõtinue point. Neanmoins selon la grandeur de la maladie, ilz eviteront tout mouvement d'esprit, comme courroux, contentions, &c. Pareillement ne coucheront avec les femmes, car cela le plus souvent
engen

engendre spasme, lequel en cest endroit est fort à craindre. Il faut que l'air ne soit trop chaut ne trop froit, & ne les faut faire endurer la soif, ce que anciennement faisoient ceux de nostre art, & encores font aucuns modernes, lesquelz encores que ce soit en esté, ne sont pas cõtens seulement de fermer le lit en telle sorte qu'à grãd peine les mouches y pourroient entrer: Mais leur amassent couverture sus couverture, tellement qu'au lieu de les cõtregarder de tũber en fievre & autres accidēs, ilz les y precipitēt en tant quil leur est possible, aidant beaucoup à cela la soif quilz leur font endurer, en telle sorte quilz morroient plus tost que de leur donner une seule goutte à boire, sinon quelque fois par la grande importunitē du patient quilz trempent une feuille de sauge ou de quelque autre herbe dedans la ptisane & la passent parmi leur bouche.

Des

Des parties necessaires à congnoître
pour la curation de rupture, & de
leur signification.

IL me semble bon premier que d'entrer
en matiere, d'escrire en peu de parolles
des parties enuers lesquelles il faut ouurer
en la guarison des hernies par operation
manuelle. Il faut dōc noter que les testicules
sont couuers de trois tunicques. La premie
re prent son origine de la peau, & est ap-
pellée Scrotum, ou bourse. La seconde qui
Scrotum
Dartos
Eritroides
Preparans
prent son origine du Peritoine, est appelée
Dartos. La tierce qui est propre ausditz te-
sticules, est nommée Eritroides, Ces deux
dernieres enuelopent non seulement les te-
sticules, mais aussi les vaisseaux spermati-
ques: tant ceux qui portent la matiere de
quoy est fait le sperme, qui sont nōmés Pre-
parans, que ceux qui portent ledit sperme
au col de la vessie, que lon appelle Eiacu-
latoires, ou Expellens, lesquels remontent
iusques au dessus l'os Pubis, par la mesme
voie par ou descendent les preparans, &
pussent

passent tous ensemble par ou le peritoine
 fait un processus: Car a vray dire, le peritoi- ^{Peritoine}
 ne en ce lieu n'est point percé le plus souuēt, ^{non percé}
 ainsi qu'aucuns ont estimé: mais fait un
 processus ou voye comme nous voyons en
 la cavité des doigts d'un gant. Or pour ce
 que i'escry ce present traité principalemēt
 en la faueur de ceux de nostre art, lesquelz
 pour la pluspart n'usent pas proprement
 de la vraye & naturelle signification des
 mots, i'espere que ceux qui se sont addōnes
 à la propriété des termes de chirurgie ne
 me sauront mal gré si ie m'accōmode à la
 commune facon de parler de ceux de no-
 stre dit art. Comme (pour exemple) quand
 ie prendray ce mot Didime pour les deux ^{Didime}
 tuniques lesquelles enueloppent les vais-
 seaux spermatiques, & pour ce qui est con-
 tenu en icelles: combien que le mot de Didi-
 me, à proprement parler, signifie le testicu-
 le. Pareillement quand i'uscray du mot de
 Dartos pour la pellicule qui est fait du pro-
 cessus du peritoine laquelle enueloppe les

B

vaisseaux spermatiques. Et de Erithroides, pour l'autre qui est plus prochaine desdits vaisseaux spermatiques: combien que proprement ilz signifient deux des pellicules qui environnent les testicules.

Des huit especes d'Hernie.

9
Divisions
des hernies

Hernies di-
tes propre-
ment

Hernies par
similitude

IL y a huit espece d'Hernie, ou rupture, desquelles les unes sont proprement telles, et les autres par similitude. Les hernies proprement dites sont faites par la relaxation ou rupture du peritoine, en telle sorte que les intestins & Epiplocon ou Zirbus perdent leur situation naturelle. Et sont trois, Enterocèle, autrement hernie intestinale: Epiplocèle, ou hernie Zirbale: Bubonocèle, ou hernie inguinale. Les hernies par similitude sont quand il y a tumeur cõtre nature en la bourse, ou es parties inguinales sans que les intestins ou zirbus sortent hors de leur lieu naturel. Et en y a cinq espece l'une est nommee hernie aqueuse, & par les Grecz Hydrocèle: l'autre, hernie charnue
autre

autrement Sarcocelé: la troisieme, Vari-
queuse: la quatriesme, Venteuse: qui est di-
cte Des Grecz Pneumatocelé: la cinquiesme
humorale, desquelles particulièrement nous
parlerons icy apres, commēceant premiere-
ment aux hernies proprement dictes.

De Hernie intestinale.

D Autant que hernie intestinale est la
plus cōmune, nous en parlerons pre-
mierement que des autres. Or n'est ce autre Definition
chose qu'une descente des intestins dedās
le scrotum. Et se fait quand le peritoine se
rompt ou elargit au lieu ou passe les vais-
seaux spermaticques. Ce qui aduiēt par quel- Cause
que excez violent, cōme de beaucoup che-
miner, sauter, crier, & autres choses sem-
blables, qui peuuent rompre ou elargir le
peritoine aux conduits par lesquels passent
les vaisseaux spermaticques qui sont aux ci-
nes. Car veu quilz sont membraneux, faci-
lement ilz se dilatent, & s'ouurent comme
un sachet ou cystis. Et a ce, ayde beaucoup

Signes

la pesanteur des intestins, & de zirbus. On
 cognoit les intestins estre descēdus dedans
 le scroton quand on est couché. car ilz s'en re-
 tournent facilement dedans le ventre, le
 plus souuēt sans presser: mais plus tost quād
 on la presse avec la main, ilz se peuuent re-
 duire, la personne mesme estant droite, cō-
 bien que c'est a plus grande difficulté. Et en
 se retirant ilz font bruit & gourgouillent.
 au moyen de quoy on cognoist que ce n'est
 point zirbus, d'autant quil ne fait point de
 bruit quand il remonte du scroton en son
 lieu naturel: ioint aussi quil n'est point tant
 doloieux. Les autres signes seront declares
 lors qu'on traictera de la hernie zirbale. Or
 quand les hernies ne sont point inueterées,
 comme quād elles ne sont point encore com-
 plettes, ie conseilc d'assayer la curation par
 medecines tant prises au dedans cōme ap-
 pliquee par dehors, a sauoir par emplastres
 & bendes a ce propres en les trēpant de-
 dans le ius d'herbes accommodees a ruptu-
 re, telles que sont les astringentes & gluti-
 natives.

Curation
par mede-
cines

*natiues. I'en ay gouvèrné plusieurs usant
des remedes sus dits lesquels en ont este gua-
ris. Toutesfois si par ce moyen on ne proufite
rien, & que la rupture soit ia complete & in-
ueterée, il faut venir a l'incisiõ, de laquel-
le nous monstrerons la procedure. Et pre-
mierement de celle qui se fait en ostant le
testicule, puis apres de celles qui se font sans
oster les parties spermatiques. Quant à
moy ie fais l'incision a la plus basse partie
du scrotum, & non sur le penil, ainsi qu'en
seignent les docteurs, & cõmunement font
les gens de nostre art. Laquelle mienne in-
vention ne sera trouuee estrãge (comme ie-
ssere) de gens de bon esprit, & qui l'auront
experimẽtee, ains beaucoup meilleure &
avec moins de danger que l'autre. Car ce
faisant, il ny a point de danger de flux de
sang, aussi ny faut il point de tentes, ioint
que les humeurs sortent d'ellemesmes suy-
uans le fillà laissé, & ne se peuuẽt arrester
en la partie, & par consequẽt y causer in-
flammation. En ceste maniere l'ay ie pra-*

Curation
par ma-
nuelle ope-
ration

Facon d'in-
ciser de
l'Auteur


tiqué par l'espace de dix ans es seigneuries
Et pais de mes Tresredoutes Seigneurs
Messieurs de Berne. Premieremēt il faut
que le patient soit purgé (si mestier est) par
le conseil du medecin. Puis un des matins
ensuyuant quand il sera renforcé, il faut qu'a
ieun il soit couché à la renuerse dessus une
table ou chose semblable ayant la teste un
peu basse. Et apres auoir remis les intestins
dedans le ventre, il faut qu'un seruiteur
presse le penil avec deux ou trois doigts de
peur qu'iceux ne retombent durant l'opera
tion. Puis faut prendre le testicule a la plus
basse partie du scrotū avec deux doigts asses
estroitement, et luy bailler au dessus un
ou deux coups de rascir ou escalpelle, tant
quil sorte dehors. Et apres conuient le ti
rer le plus qu'on pourra, sur tout si la rupture
est grande. Car selon la rupture il faut tirer
du didime (ce qui gist en la discretion de l'o
perateur) en remontant le scrotum contre
le penil. Et faut en tirant le didime le de
scharner et separer du scrotum. Et cōme
i ay

j'ay dit, le tirer iusques à tant que ce soit
 asses. Car autremēt il i auroit dangier que
 puis apres il ne fit eminence, pour le moins
 es parties qui sont au dessus du scrotum. Le
 quel inconuenient adueni, il vaudroit mi-
 eux n'y auoir rien fait. l'en ay gouuerné qui
 auoiet este coupe deux fois, & faisois le troi-
 siesme d'un mesme coste. Ce qui estoit ad-
 uenu à cause qu'on auoit lié le didime trop
 bas. Par quoy il se faut donner garde de
 faire tant à la volee les choses qui sont de
 si grande importāce, afin qu'on n'expose le
 patient en danger. Mieux vaudroit leur
 desrober leur argent. Pource donc il est ex-
 pedient que chacun y procede en bonne con-
 science, & Dieu benira l'œuvre. Car celuy
 qui n'a veu de long temps exercer ledit
 art, & n'y est experimenté, peut faire beau-
 coup de dommages, considere la grande di-
 uersité des hernies qui se trouuent tous les
 iours. Apres donc auoir suffisamment tiré
 le didime, il le faut comprendre avec la te-
 naille le plus haut contre le ventre quil se-

Longue ex-
 perience re-
 quise à cest
 art

ra possible en l'estreignant asses fort, et en le tirant tousiours de pour quil ne retourne deuers le ventre: Et si conseille de garnir la tenaille au dedans avec du veloux ou autre chose douce comme peau pour euit inflammation, laquelle pourroit suruenir à raison de la contusion et douleur que pourroit faire ladite tenaille.

Cautere. Aguille. Tenaille.



Et ce

Et cela fait, il faut coudre le didime en ceste sorte. Laguille sera un peu plus longue que le doigt, & un peu courbe enfilee de fil commun en trois ou quatre doubles, de la longueur qu'on verra estre expedient lequel soit oinct d'huile rosat, ou beurre frais qui ne soit point salé: laquelle aguille il faut passer avec la plus grande partie du fil par le milieu du didime au dessus des tenailles, tant pres dicelles qu'on pourra, Puis en environ nāt la moytié du didime, il la faut retourner passer par le lieu mesme, par on lauoit passée. Et cela fait on cōprēt le bout du fil qu'on na point passé & l'autre la ou est laguille, & les nouē-on ensemble en cōprenant l'autre moytie du didime. Et adōc il faut elargir un peu les tenailles, acelle fin de mieux conioindre les parties du didime ensemble, se gardant toutesfois de trop estreindre, crainte d'exciter inflammation, & de ne le trop lacher, de paour quil ne suruint flux de sang. Apres faut coupper le didime asses pres du filet, pourueu que ledit filet tienne

B s

Cauteres

ferme. Car si la cousture se defaisoit par quelque toussiment, ou autre excez, les intestins descendroyent derechef dedās le scrotum, qui seroit pis que parauant. Ayant fait cela, il faut cauterizer avec fer chaut, ou d'autre metal, ou bien avec huile rosat boillant, ou autre chose semblable: duquel huile i'ay usé depuis huit ans en ca, & m'en suis tresbien trouué. Car le fer chaut donne grande apprehension au patient, laquelle luy nuit grandement. Or applique-ie ledit huile avec un aspergeoir, me gardāt qu'il n'atouche les parties circonuoisines. Il faut que les bouts du filet demeurent asses longs, tellement qu'ils sortent hors de la playe, lesquels serviront de tente. Alors on pourra ouurir les tenailles, & le didime retournera de soy mesme dedans le ventre.

Restreintif

Puis on mettra les restraintifz qui s'ensuyuent dessus la playe & dessus le penil en y mettant un petit coussinet avec bendes mediocremēt estraintes, principalement dessus la playe. Car si celles estoient trop serrees

rees elles feroÿēt attraction d'humeur. Si le
scrotum venoit a estre estonné, ce que n'ay ^{Scrotum}estonné
point veu despuis que i'ay coupé a la plus
basse partie de le scrotum car il ne se peut
bien faire a cause des humeurs qui en sor-
tent d'elles mesme, il ne faudroit faillir a
l'ouurir avec la lācette ou rasoir en plusieurs
lieux (si mestier estoit) & souuēt pour va-
cuer ceste humeur virulente qui ne peut
autrement sortir a son aise. Car il y auroit
danger que ce venin ne luy montast au
cœur, & qu'il le suffocast, luy donnant quel
que defensifz par dedans, comme theriac,
ainsi que sera dit en l'extirpation des mem-
bres. Et par dehors on pourra user de ca-
taplasmes sedatifz de douleur, ou de celuy
qui est ordonne pour les inflātions. Et
ayez ceste facon pour la plus excellente de
toutes les autres & la plus seure, non que ie
vueille dire que les autres ne puissent estre
proprement faictes.

Je ne veux oublier un accident qui
m'est aduenu plusieurs fois ayant fait l'inci-
sion

9 sion sur le penil. C'est qu'il suruenoit telle inflammation au scrotum, a la verge, *et* au penil, que le scrotum venoit en estiomene d'un coste *et* d'autre, tellement qu'il tomboit tout, *et* que le testicule demouroit tout nud, *et* la verge se fendoit en deux parties ou deuenoit pointue *et* longue, y estant aucune fois quelque blancheur a la pointe. Et le penil se rompoit a la fin de la maladie, quelque fois en un ou plusieurs lieux. Laquelle inflammation leur suruenoit tant a raison du mauuais gouvernement du patient que par faute d'auoir fait euacuation suffisante deuant que commencer l'incision. Or combien qu'il y eust ainsi deperdition du scrotū qui est partie spermatique, neantmoins il reuenoit à l'entour du testicule *4* une autre peau semblable au scrotum laquelle se fust cicatrizée deuant que d'auoir couuert tout le testicule si ie n'y eusse remedié tant par medicamēs incarnatifz, qu'en contenant le testicule dedans ladicte peau, *et* ce avec bēdes ou choses semblables. Le testicule

sticule étant ainsi recouvert, la peau s'elargissoit petit a petit en telle sorte quelle ne differoit ny en quantité ny autre chose a la premiere. I'ay mis cecy, a fin que le chirurgien ne perde point courage quand un tel inconvenient luy aduiendra mais qu'il use plus-tost des remedes susditz.

Premier appareil.

R. albumina ouorum nu. iij. boli arme Appareilz
ni puluerisati ꝑ. ij. ceruse ꝑ. ss. oppij
scrup. j. olei rosati ꝑ. ss. fiat in modum cataplasmati & soit appliqué avec des estoupes trempées en oxycraton & estreintes.

I'use quelque fois de celui qui sensuit quand ie crains inflammation.

R. aqua vel succi plātiginis olei rosati, aceti, & albumina ouorum ana quantum sufficit, & soyent fort meslez ensemble & appliquez (comme a esté dit) les deux premiers iours en les remuant deux ou trois fois le iour. On peut aussi bien user d'oxycraton. Quand il leur survient douleur, i'use du catapla

taplasme qui sensuit.

R. medulla panis al. duri in aqua feru-
uenti infusi. *℥* ab eadem expressi lib. j. vi-
tellos ouorum nu. iiij. olei rosati quantū suf-
ficit ad incorporandum misce, fiat catapl.
℥ soit appliqué avec laine surge, ou chose
semblable. On peut user pour la mesme
chose de celuy qui sensuit, lequel est aussi pro-
pre a faire tomber l'escarre.

R. olei rosati *℥* butyri recentis non sa-
liti ana *℥* iij. vitellos ouorū nu. iiij. croci
scrop. *℥* misceantur.

Quand il est besoin d'incarner, i' use de
celuy qui sensuit,

R. cere resinæ ana *℥* iij. axungie
porc. recentis *℥* v. misce, fiat unguen-
tum. Idem.

R. cere albæ resinæ ana quartar. j. olei
℥ ij. therebintina lotæ in aqua plantagi-
nis *℥* j. thuris masth. ana *℥* *℥* s.
misce, fiat unguentum.

S'il survient inflammation on usera du
cataplasme qui sensuit,

R. ma

R. maluarum violarum ana manip. ij. decoquantur in sufficiente quantitate aquæ, deinde concoquantur & colentur. De colatura cape lib. β. cui adde farine frumēti tantundem olei viol. olei ros. & aceti optimi quantum sufficit ad incorporandum. misce fiat cataplasma.

On pourra user du nutritum suyuant.

R. lithargyri auri & coruse ana unc. j. caphure scrup. j. albumina ouorum nu. ij. olei ros. aceti optimi & succi plantaginis ana quantum sufficit. fortiter agitentur in mortario simul. Et soit fait nutritum.

Et s'il est besoin d'abstersion, cōme quād il y a sang corrompu, on pourra user de l'abstersif qui sensuit, qui est assez benin, en faisant une iniection dedans l'ulcere.

R. aquæ hordei lib. β. mellis ros. & sacch. cand. ana unc. j. bulliant simul, & soyent seringueez dedans l'ulcere. Pour la mesme chose on pourra user d'hydromel.

S'il est besoin de plus grāde abstersion on pourra user du mundificatif qui sensuit,

R. suc

R. succi appij lib. j. mellis lib. β. farina hordei vel fabarum ꝯnc. ij. coquatur mel cum succo ad succi consumptionem, deinde farina addatur & misceatur, fiat Unguentum. Si on craignoit qu'il y arriuaſt chancre ou fistule, on pourra adiouſter du ſuc d'absynthe. Et s'il ſuruenoit chaleur on y adiouſtera du ſuc de plantain.

Quand il y ſuruient apoſtume chaude qui ne peut ſe terminer que par ſuppuration, ie la fais ſuppurer avec le cataplaſme qui ſenſuit.

R. maluarum cum rad. alteæ cum rad. viol. ana manip. j. ficuum nu. xij. decoquantur omnia ſimul in aqua feruida cõtundantur, & per cribrum tranſmittantur. de colatura accipe lib. β. cui adde axungie porci recētis & butyri recētis nō ſaliti ana ꝯnc. j. β. olei viol. & olei camomile ana ꝯnc. j. vitellos ouorum nu. iij. farina frumēti, farina ſeminis lini & medulle panis alb. ana quātum ſufficit ad inſpiſſandum miſce, fiat catapla. & ſoit applique de laine
ſurge

surge ou estoupes.

Si l'aposteme est d'humeur froide, i' use de celuy qui sensuit.

R. ceparum alliorum, & rad. lapat. acut. sub primis costorum & diligenter cotusorum ana ꝑnc. j. axungia porc. ꝑnc. ij. vitellos ouorum nu. ij. farina frumenti fæni grec. ana quantum sufficit ad inspissandum misce, fiat cataplas.

Quelque fois il survient conuulsion durant la cure, a laquelle on pourra user de longuent qui sensuit.

R. olei communis aut camomila, butyri non saliti ana ꝑnc. iij. olei mustellini ꝑnc. j. olei petrolei ꝑnc. ss. cera ꝑnc. j. styracis cal. styr. rub. ana drach. ij. ss. masth. thuris, gummi, hederæ ana ꝑnc. ss. Les choses qui doivent estre liquefies soyent liquefies: puis on adioustera les poudres en mettant styrax le dernier. Le tout soit bien meslé ensemble & soit fait unguent, duquel on oindra le membre conuulsé. Ou bien on usera du sequent lequel est plus fort.

C

R. olei camomila, olei aneth. rutacci,
yrini, de lilio & de euphorbio ana ꝑ. unc. ꝑ.
axungia vrsi & vulpis ana ꝑ. unc. j. un-
guenti dialth. ꝑ. unc. iij. aqua vite ꝑ. unc. ij. ꝑ.
cera citrine quantum sufficit. bulliant olea
cum aqua vite ad aqua cōsumptionē, de-
inde alia misceātur. & soit fait unguent
duquel on vsera comme a asté dict.

S'il estoit constippé, il faudroit vser de
clysteres, & suppositoires desquelz il nest in-
conuenient de mettre icy un formulaire.

R. maluarum beta, mercur. viol. pa-
riet. & furfuris ana manip. j. decoquantur
in aqua sufficienti. de colatura accipe lib. j.
ꝑ. in qua dissoluantur cassia fist. recentis ex-
tract. & mellis ros. col. ana ꝑ. unc. j. olei com-
munis ꝑ. unc. iij. vitellos ouorum nu ij. salis
parum misce, fiat clyster.

R. mellis cocti ad formam solidam v-
que ꝑ. unc. iij pul. bened. drach. v. salis gem-
me drac. ij. misce & fiant suppositoria.

Si lon nauoit point de benedicta, ny de sal
gemme, il faudroit mettre force sel cōmun
avec

avec le miel. en une neceſſité on peut uſer d'un moyeu doeuſ batu avec force ſel en l'enueloppant en un petit linge en maniere de noix muſcade. Et le mettre dedans le fondement. Ou pluſtoſt on prendra un grain de ſel marin ou quelque autre choſe acre Et le mettra on cōme a eſté dit, à fin d'inciter la faculté expultrice.

Le conſeille auant que de cōmencer l'operation ſoyent hernies ou pierres d'uſer de ſirops cordial Et epithime qu'auons eſcrit a l'extirpation des membres pour corroborer la partie Et defendre les vapeurs qui peuuent eſtre communiquees aux parties nobles.

Autre façon ſans oſter le teſticule.


PVis que nous auons deſcrit la maniere de proceder en la cure des hernies inteſtinales en oſtant les parties genitales, il reſte d'enſeigner la maniere de les curer ſans deperdition deſdictes parties. Ayant preparé le patient comme nous auons dit

icy deuant, il faut couper le scrotum en sa plus haute partie, puis passer le doigt ou un crochet par dessous le didime à fin de le cōprendre tout. Et cela fait le tirer d'en haut vers l'incision en le descharnant tousiours avec les doigts, du scrotum, *et* autres parties ausquelles il adhere avec ses fibres.

Après il faut mettre les vaisseaux spermatiques au costé du didime. Ce qui se pourra faire facilement à raison de la dilatation de dartos *et* heritroides ou biē prendre le didime là ou il n'ya point de vaisseaux en double. Et ce pendant il faut tirer le testicule en se donnāt garde autant qu'il sera possible de le separer d'avec le scrotum. Et quand le didime sera tiré à suffisance à sauoir selon la reigle que nous auons donné cy deuant, on mettra la tenaille (de laquelle nous donnons la figure) *et* la tiendra-on assez ferme.

Tenaille.

Tenaille.



Puis conuient lier le didime comme sen
suit. Apres auoir diuisé en son esprit la lar
geur du didime en quatre parties eguales,
faut auoir une aiguille telle que nous l'auõs
descrite, & enfilee de mesmes. Laquelle on
passera par le commencement de la seconde
partie, & la retournera-on passer par la
fin de la troisieme partie au commence-
ment de la quatriesme en telle sorte que le

9
filet comprendra deux des parties de la
largeur du didime, à sçavoir celles qui sont
au milieu. Et alors on liera les boutz du
filet ensemble ainsi que nous auons dit cy
dessus. Et ce fait conuient couper de tra-
uers assez pres du filet la plus grand part
du didime, à sçavoir celle qui est comprise en-
tre les deux pointz d'aiguille qu'on aura
fait. Et couper ledit didime depuis l'ouuer-
ture iusques au filet à fin qu'il ne demou-
rast enclos. Et le scarre se fait mieux. Puis
faut faire une ouuerture au dessous en long
à celle fin que la sanie & autres humeurs
se puissent euacuer. Ou bien il faut le cou-
dre au dessous cōme on a fait au dessus, &
coupper atrauers tout ce qui est compris en-
tre les deux coustures, en faisant une ou-
uerture au didime pres le testicule à ce que
les humeurs ne descendent là, à cause de la
douleur, & y causent inflammation s'il n'a
uoyent issue. Cela fait il faut cauterizer &
proceder en la guarison comme dessus, en
laissant les filetz bien longs à fin qu'ilz sor-
tent

tent hors la playe. On pourroit aussi bien faire l'incision aux deux costez, a chacun un peu, en laissant les vaisseaux spermatiques au milieu du didime, ou la faire seulement en un des costez en mettant les vaisseaux spermatiques en l'autre, car il est tres utile en toutes ces sortes moyennāt que les parties spermatiques ne soyēt point blessees, & que la voye par ou les intestins auoyent de coustume de tomber dedans le scrotum, soit tant estroicte que puis apres ilz n'y puissent rechoir, car c'est l'intention pourquoy on le fait. Et aussi pour auoir lignee & principalement à ceux qui n'ont qu'un testicule. Car l'auoir oste il n'ya plus esperance d'auoir enfans. Je conseille à tout homme de lart que s'il na veu exercer ceste facon à quelque bon maistre qu'il ne l'entreprenne à cause de la difficulté, & de la conscience. Car premierement faut là regarder & Dieu benira l'œuure.

Autre façon avec le fil d'or, qu'on appelle poinct doré.

Poinct
doré


I L y a une autre maniere de proceder en la guarison des hernies intestinales en conseruant les testicules & autres parties dediees à la generation qu'on appelle le poinct doré, laquelle se peut faire facilement tant soit grande la rupture. Ce que i'ay expérimenté y procedant comme sensuit. Ayant fait l'incision au lieu qu'a esté dit au chapitre precedant, & ayant tiré le didime à suffisance, en obseruant toutes les choses qui ont esté dictes audit chapitre, ie metz la tenaille petite que i'ay dessus descripte, en sa plus haute partie, & la tiens bien ferme, puis i'ay un fil d'or de ducat ou d'autre or semblable de la longueur de deux doigtz & de la grosseur d'une grosse espingle, lequel est poinctu d'un des boutz, puis ie diuise en mon esprit la largeur du didime en quatre parties esgualles comme i'ay dit, & passe mon fil par la fin de la premiere partie & commencement de la seconde

conde, en le repassant par la fin de la troi-
sieme *et* commencement de la quatrieme
partie me donnant garde de toucher aux
vaisseaux spermatiques. Cela fait, ie le re-
tourne passer derechef par la fin de la pre-
miere partie puis ie le passe plusieurs fois
par dessous le premier fil, cōme si de deux
ie vouloies faire un aneau tors. Et puis ie
le repasse par la fin de la troisieme partie
(comme a esté dit) par le pertuis mesme,
et le passe par dessous l'autre fil par plu-
sieurs fois, tellement que ie comprends avec
mon fil la moytie du didime: combien qu'il
ny a point de danger d'en comprendre d'a-
uantage, afin que les vaisseaux spermati-
ques passent plus aysément, moyenant tou-
tesfois que les intestins ne puissent passer.
Or ayant ainsi fait deux tours avec le fil
d'or ie replie ces deux boutz l'un avec l'au-
tre bien ferme avec des petites tenailles pro-
pres à cela, (ainsi comme vous la voyes
figuree) comme font ceux qui font des chai-
nettes *et* mailles les ayant premierement

C s

bien limez, & apres aussi, de pour qu'ilz
n'ulcerent la partie quand ilz seront re-
mis dedans.

Tenaille.



Toutes ces choses paracheuees, il faut re-
mettre le didime dedans, & proceder au
reste comme a esté dict au parauant. Et
alors la chair se consolidera, & tiendra le
fil d'or ferme & ne faut craindre que le-
dict fil face douleur ainsi comme i'ay expe-
rimen

rimenté avec ce qu'il est amy de nature
comme le plomb.

Autre façon.

IL y a beaucoup d'autre manieres de cu-
rer ces hernies par chirurgie, cōme escrit
Guidon & autres, desquelles ie ne parle-
ray pour le present, sinon que ie diray ce
mot, C'est qu'entre toutes celles qu'ilz bail-
lent, ie trouue celle la meilleure, en laquelle
apres auoir coupe dessus le penil, & tire
suffisamment le didime, en le liant en sa
plus haute partie avec un filet bien a suf-
fissance (toutesfois sans trop estraindre de
pour d'y causer inflammation) on tire le te-
sticule dehors & l'y laisse on iusqu'a ce
qu'on cognoit qu'il est mort, & qu'il a per-
du le sentimēt. Puis apres on le coupe au-
pres de la ligature en le consolidant com-
me i'ay dit. Car ce faisant, il n'ya point tant
de danger de mort a cause de d'hemoura-
gie, comme à ceux auquelz on fait la ligatu-
re & l'incision du testicule tout a la fois,
combien

4 combien que noz predecesseurs, & mesmes plusieurs des modernes ayēt vſé & vſent encore le plus ſouuēt. Je conſeille à tout homme qui ha le prouſit de ſon prochain, & ſon honneur en recommandation d'vſer de la maniere d'incifer que i'ay deſcrite qui ſe fait au ſcrotum, & il ſ'en trouuera bien. Ioinct qu'ilz n'en ont que la premiere apprehenſion.

Des accidens qui aduiennent a la
hernie inteſtinale.

Accidens
dangereux

I E ne veux omettre les accidens qui arriuent bien ſouuent à Enterocelé. Et principalement ceux qui ſont les plus dangereux, & deſquelz i'en ay penſé pluſieurs. Car ie n'ay leu perſonne qui en ait eſcrit. Il arriue quelque fois hernie inteſtinale que l'intestin eſt adherēt au didime, en telle ſorte que puis apres il ne peut retourner en ſon lieu, ce qui ſe fait par ſucceſſion de tēps, à raiſon de quelque humidite viſqueuſe qui cauſe ceſte colligance: ou bien de quelque
exco

Cauſes

excoriation qui peut estre faicte en redui-
sant si souvent les intestins, ou par autres
causes semblables. i'en ay pensé un de ceux
cy, qui auoit esté huit ans sans iamais pou-
voir remonter l'intestin. Laquelle chose luy
dura si longuemēt sans mourir, pour ce que
le trou qui est au peritoine par ou descen-
dent les intestins *et* aussi les autres parties
estoyent fort larges, tellement que la ma-
tiere fecale sortoit a son aise sans estre re-
tenue dedans le scrotum. Il faut bien se gar-
der de ne prendre ceste espece pour une
autre, veu que la tumeur ne s'en va point
ny en la pressant avec la main ny quand
on est couche. (Ce qui est commun aussi aux
hernies dictes improprement. Mais on co-
gnoistra la hernie charneuse, pource qu'en
icelle il y a des duretez, schirreuses *et* sca-
breuses lesquelles semblent estre disconti-
nuees. Ce qui n'est en ceste cy, ains au haut
du didime est plus espez ou gros à cause des
intestins qui y sont. Les autres signes pour
les distinguer seront dictz cy apres quand
nous

Signes

Cure

nous parlerons des hernies dictes improprement. Pour venir à la cure il faut couper le scrotum en sa plus basse partie, (comme a esté dit) & y faire bonne ouverture pour plus aysément œurer. Et cela fait, il faut ouvrir le didime auprès du testicule. Et le peut on couper sur son ongle, ou tirer les tuniques du didime avec des crochets, & les couper petit à petit iusqu'à ce qu'on soit à l'intestin, en se donnant garde de le couper. Puis cela fait, on descharne doucement avec le doigt l'intestin d'avec le didime: La separation sera facile en y procedant discrettement. Ayant fait cecy il faut remettre l'intestin dedans le ventre & proceder au reste comme auons monstré.

De la retention de la matiere fecale
dedans le Scrotum.

IL y a un autre inconuenient qui aduiēt
aux hernies intestinales, lequel est beaucoup plus dangereux que le precedant: c'est quand il ya tel amas de matiere fecale dedans

dans le scrotum, que puis apres ne l'intestin, ne ladicte matiere ne peuuent passer par le trou du peritoine, en telle sorte qu'on ne peut aucunemēt aller a seelle, ains la matiere fecale ainsi retenue, cause une inflammation telle aux intestins & parties circonuoisines qu'en bref il faut mourir. Si on voit que le scrotum ayt changé de couleur Signes et soit deuenu noir, liuide ou bleu, et que la hernie soit pluſtost en rond que long, il ne faut point entreprendre la guarir. Car ces signes sont mauuais, comme quād on voit la bouche liuide noirs nēz et yeux et c. Mais faut user des remedes que ie dis quand la partie n'a encore changé de couleur, et est en long. Apres auoir essayé tous autres moyens, comme par remolitifz et suppositoires fort aiguz et luy leuant les iambes en haut pour tacher de reduire les intestins dedans le ventre, il est necessaire de venir à cestuy cy lequel merite d'estre mis par escrit. Il faut auoir un petit baston Cure qui soit plat au dessus et rond au bout, et le passer

le passer par l'incision qu'on fera en la plus haute partie du scrotum iusques au didime & le pousser contremont entre le didime & la chair du scrotū & du penil, en coupant petit a petit ladicte chair sur le baston, de pour de blesser le didime, & par consequent les intestins. Et quand on aura fait assez bonne ouuerture, on essayra a remonter les intestins. Que si par cas fortuit il ne se pouuoit faire a raison de la grande abondance de metiere, ou de l'inflammation, il faudra couper le didime dessus l'ongle ou en leuāt les tuniques avec chrochetz, comme a esté dit, & le couper iusques à l'intestin. Et puis en mettant le baston entre l'intestin & les tuniques du didime, il faut couper lesdictes tuniques sur le baston en montant tousiours vers le ventre, & faisant bonne ouuerture, mesmes au peritoine, ainsi que i'ay fait autre fois: car par ce moyen les intestins se pourront reduire plus facilement & à moins de difficulté. Cela fait, & estans reduitz, il faut faire l'incision

l'incision du testicule comme a esté dit cy de
uant, moyennant que le patient en soit d'a-
uis (Ce qui est le plus expediēt) en le tirant
par la playe. Si d'aventure il y avoit inflam-
mation ou fieure, il faut différer iusques à
ce quelles soyent passées pour le moins ius-
qu'à ce que le patient soit renforcé en appli-
quant ce pendant cataplasmes ou autres
choses mitigatives de douleur. Et s'il ne
vouloit estre coupe on usera de bandes
& autres remedes topiques a ce propres
comme a esté dit.

De Hernie zirbale.

Hernie Zirbale que les Grecz appel-
lent Epiplocelé n'est autre chose que
la cheute de zirbus (qui est une graisse qui
couvre le vêtre) dedās le scrotū. & se fait
par dedās le didime le plus souuēt: combien
qu'aucunes fois il vient par dehors le didi-
me, comme l'ayāt rompu, ou le peritoine.
Les causes tant internes qu'externes sont
semblables à celles de hernie intestinale:

Definition

Cause

D

car il y a dilatation ou rupture au peritoine
 & a son processus, & ce a cause de quelque
 excez, comme de crier, sauter, & autres
 semblables, ou à cause de la trop grande hu-
 midité desdictes parties. Il y a tumeur com-

Signes

me en la hernie intestinale, mais elle est
 beaucoup plus molle, tant qu'il semble qu'on
 touche de la laine. Laquelle est aussi moins
 douloureuse, combien qu'elle s'en retourne
 plus difficilement que les intestins & sans
 aucun bruit. Elle n'est pas aussi si dange-
 reuse comme l'intestinale: car la douleur
 n'est pas si grande, ioinct aussi que la matie-
 re fecale n'est point retenue comme en l'in-

Cure

testinale: Or ne faut il point proceder en la
 cure comme ont fait & font encore aujour-
 d'huy plusieurs lesquels couppent du zirbus
 ce qui est descendu dedans le didime, sans
 puis apres le cauterizer ne lier. Car il sur-
 uient flux de sang, lequel n'ayant point dis-
 sue, ains retenu dedans le ventre se cor-
 rompt & cause des symptomes pernicioeux
 & le plus souuent la mort. Ce qui arriua a

Un

Un maistre bien expert avec lequel j'ap-
prenoy nostre art. Car ayant entrepris de
curer enteropiplocelé, c'est adire descente de
l'intestin & zirbus tout ensemble, ouurit
le didime & couppa le zirbus. Et sans estre
lié ny cauterize le remist dedans le vêtre,
puis proceda à la hernie intestinale en liāt
& couppant le didime cōme de coustume.
parquoy le zirbus flua & le sang fut retenu
à cause de la ligature estroite & causa in-
flammation & la mort. Si on le peut gua-
rir sans oster le testicule, pourueu que les
intestins n'y descendent, & qu'il ny ait que
epiplon, ou bien que le patiēt ne veille qu'il
luy soit osté, il faut faire l'ouuerture com-
me nous auons dit, en traictant de her-
nie intestinale. Puis prendre le zirbus, &
le tirer autant comme il en sortira hors de
son lieu. Et le lier tant haut que faire ce
pourra. puis le coupper assez près de la liga-
ture en le cauterizant comme a esté dit &
le laissant retourner dedans le ventre, lais-
sant aussi les filetz assez longs hors la playe.

Mais s'il est expedient de couper le testicule, cōme quand l'intestin & l'Epiploon tombent tous deux ensemble dedās le scrotum. Alors si l'Epiploon est fort petit, & qu'il ne soit point alteré, on le pourra remettre dedans le ventre puis procurer la guérison de hernie intestinale, comme nous avons enseigné. Mais si l'Epiploon est corrompu ou alteré, ou bien qu'il soit tombe en grāde quantité, Il faut premierement le lier au plus haut, puis le couper & cauterizer cōme nous auons desia monsté, en ne laissant rien de ce qui est alteré, Et s'il ne vouloit tout sortir, comme quand il est adherent au didime (ce que i'ay veu autre fois) il faut coudre ou lier le didime & zirbus ensemble le plus haut qu'il sera possible puis le couper & cauterizer cōme dessus, se donnant garde de couper les intestins avec le didime: car il ne s'ensuiuroit que la mort. Combiē que ie ne doute point que plusieurs ne l'ayent fait: aucuns pour auoir plus tost faict, les autres par ignorance, les autres pour

pour tous les deux. Car voyant quelque chose grosse, n'ont peu discerner si c'estoit l'intestin ou le zirbus, ou quelque carnosité. parquoy il faut regarder diligement aux signes qu'auons baillé icy deuant, et que baillerons cy apres pour les distinguer, ou plustost ouurir le didime en sa partie inférieure, pour estre assure que c'est.

De la relaxation du peritoine,
dicté Hernie inguinale.

Hernie inguinale est la descente des Definition
intestins ou de zirbus aux aines, que les Latins appellent Inguina. Et ce par le processus du peritoine, ou par dehors quād ilz passent par ledict processus. Elle a de coustume de precéder l'intestinale & la zirbale. Car quand l'intestin ou le zirbus tombent vers le scrotum par ledit processus du peritoine, premierement ilz font tumeurs aux aines, puis apres petit a petit elle vient au scrotum, là ou elle est consommée. Nous ne parlerons maintenant que

de celle qui se fait quand les intestins ou zirbus tombent sur l'eine sans passer par le trou du peritoine. Et ceste cy ne passe iamais l'eine. On l'appelle communement relaxation, a raison que le peritoine estant relaxé, les intestins ou zirbus tombent dessus les ei-

Causes

Signes

Cure

nes. Les causes sont telles que des deux precedētes, & la cognoit on à sa rondeur, & pour ce quelle s'en retourne plus facilement qu'aucune des autres. Quand les intestins y sont descēdus, ilz s'en retourne avec bruit & gourgoulement: ce qui n'auoient point tousiours, mais le plus souuent comme a esté dit à Enterocelé. Mais quand cest le zirbus, il ne fait point de bruit en le remettant, & si est aucunement plus mol, & ne fait point tant de douleurs. I'ay pense plusieurs hommes & femmes par le moyen qui sensuit: Je fay mettre le patient contre un banc ou chose semblable, laquelle soit a demy droicte en luy attachant, si besoing est, les cuisses. Car quand aux mains on les pourra tenir. Puis ie pren avec les tenailles le cuir qui est
au

au milieu de la tumeur, & le coupe dessus icelle à fin qu'il nait point tant de sentimēt, combien qu'on le peut coupper sans icelles, neanmoins i'en use tousiours iusques à ce qu'on trouue le cystis qui enuelope le zirbus ou intestins qui font la tumeur. Quelque fois en faisant l'operation, les intestins se reduisent & ne peut on pas trouuer ledict cystis, & pour ceste cause ie le fais tenir à demy droict si ce nest que la relaxation soit bien grande. Car en toussissant les intestins y retombent facilement, & le monstrent. Iceluy est fort deslié, car cest vne partie du peritoine. Alors ie le prens en remettant le zirbus ou intestins dedās le vêtre. Et le separant de mirach, ie le tire en haut. Et pour le faire plus aysement on peut passer vn filet a trauers d'iceluy & tirer le filet en prenant le cystis avec vn linge deslié. Et le faut tirer iusques a tāt qu'on soit au vuyde, en le descharnāt tout à l'entour. Puis ayāt mis la tenaille, ie le cous & lie, coupe & cauterize comme asté dit de rupture. Mais

s'il aduenoit qu'on eust coupe le cystis en faisant la playe & a ceste cause qu'on ne le peut trouuer, il faut prendre les parties profondes de la playe, en comprenant, s'il est possible, le peritoine, & les coudre ensemble, & cauterizer comme dessus, en les bendant asses estroictement, ayant premie remēt mis les reſtraintifs qu'auons au par auant deſcrit.

Des Hernies improprement dictes &
premierement de Hernie aqueuse.

Definition
de hernie
aqueuse

Iusques à present nous auons parlé des trois especes de hernies dictes proprement, il reste à parler des cinq especes dictes hernies par quelque similitude. Nous parlerons premierement de l'aqueuse : laquelle n'est autre chose qu'une tumeur du scrotum faicte à raison de leau laquelle petit à petit s'est illec amassé. Le plus souuent elle est cōtenue entre heritroides & les vaisseaux spermatiques combien que quelque fois elle peut estre contenue entre dartos & heritro

heritroides & entre dartos & le scrotum ainsi qu'ont escrit aucuns docteurs. Ce que ie n'ay point veu. Vray est qu'en pensant des hernies intestinales, i'ay bien trouué d'eau comprise en un petit cystis. l'estime qu'elle estoit entre dartos & heritroides. Et se f Causes
 fait a raison de l'erreur de la faculté sanguifique, laquelle au lieu d'engendrer bon sang engendre de l'eau. ou bien elle se fait a raison de l'imbecillité des roignons, & autres parties desdiees a separer l'urine, ainsi S Signes
 qu'il apert es hydropiques. Principalemēt en Aschites les signes sont que le scrotum devient gros petit a petit, & sans douleur le plus souuent. La tumeur est pesante & fort luyssante, & dure: principalemēt quād le scrotum est remply. Elle vient longue, & ne s'en retourne pas comme font l'intestinale & la zirbale: ains plustost demeure stable sinon que quelque fois elle se resoult es commencemens: car puis quelle est grande ne ce resoult pas volontiers. Davantage elle est aussi fort unie, au contraire de la


D s

hernie charneuse laquelle est fort nodeuse
et ineguale. Premièrement que de venir
a l'incision, il faut essayer a la guarir par
medecines, aussi estre asseures que ce ne sont
point les intestins ou Epiplocon, ce qu'on pour-
ra cognoistre par les signes dictz cy deuant.
Il faut aussi cōprimer le didime et le scro-
tum le plus haut qu'on pourra iusques à ce
qu'on trouue le vuide. Car si le didime est
fort prin, cest adire que les intestins ne zir-
bus n'y sont point. Dauantage en pressant le
dict scrotum de haut en bas, la tumeur se
fait plus dure et plus grosse au bas de la
bourse à raison de l'eau qu'on y faiet descen-
dre. Aussi en mettāt une chandelle d'un
couste et regarder de l'autre on la voit quelle
Cure reluit et est clere. Il faut donc cōmencer la
cure en ceste sorte, à sauoir en ostant le te-
sticule en la sorte que auons cy dessus mon-
stré es hernies, si on voit quil soit aucune-
ment endommagé à cause de la longue de-
meure de leau, mais premièrement que de
lier le didime il faut laisser bien euacuer
ladicte

ladiète eau. Si on voit que le testicule ne soit point endōmagé & qu'il soit moleste au patiēt de le perdre, il faut proceder par autre moyen cōbiē que le premier est plus bref & le plus seur. Iay autrefois usé de Seton Seton & souuent, duquel ie monstrey la procedure, combien que ie ne l'approuue pas beaucoup. Puis ie monstrey comment i'y procede maintenant. Il faut donc comprendre le scrotum & le didime avec les tenailles a seton, & les estraindre le plus qu'il sera possible, puis auoir une aguille longue d'un demy pied ardente, a fin qu'elle passe plus aysement laquelle soit enfilee de fil de soye en huiēt ou neuf double, & la passer le plus tost qu'il sera possible (de pour quelle ne se refroidisse en leau) par les deux trous des tenailles, se gardant de toucher toutesfois à la suture de la bourse, ny aux testicules. Cela faict, il faut laisser ledict seton, & le faire tourner tous les iours à fin d'e-uacuer l'eau petit à petit.

Tenailles

TRAITE DES Tenailles à Seton.



Or si quelcun vouloit user de Seton, ie
 luy conseille de le passer sans les tenailles en
 courbant un peu le bout de son aiguille.
 Car pource qu'il est besoing d'estraindre
 fort les tenailles pour approcher les trous
 l'un de l'autre, ou autrement l'aiguille ne
 pourroit plus aller droict de l'un a l'autre,
 il y survient souvent inflammation qui em-
 pesche l'eau de sortir, laquelle si elle estoit
 gran

grande ie conseille d'oster le seton en tachant tousiours premierement à la guarir par cataplasmes, ou choses semblables.

Puis euacuer le reste de l'eau avec ouuerture a la maniere que dirons cy apres. Autre cure de l'Auteur Le trouue toutesfois la methode qui sensuit beaucoup meilleure, à sauoir de faire ouuerture au didime avec la lancette ou rasoir enuiron deux doigts pres du testicule en allant contre mont de paour de blesser les vaisseaux spermatiques. Et faut que ladicte ouuerture soit de trois ou quatre doigts, toutesfois selon le personnage. Cela faict il y faut mettre vne tente de charpis ou destoupes ou d'autre chose suauce, qui soit peu espaisse & assez large pour empescher la glutination des labies, en la trempant premierement en l'huille rosat qui soit vn peu chaut. Puis mettre dessus des restraintifz cōme a este dit de hernie intestinale, pour empescher trop grand flux d'humeur ou inflammation. Et faut changer la tente assez souuent pour euacuer l'eau si d'elle mesme
ne

ne s'euacue. Car tant plus la playe est grande & demeure long temps à se consolider, on est assure quelle guerira, & que leauny reuiendra pas à cause que les humeurs se sont euacuees, & par consequent les parties desséchées, ce qui ne se peut tant facilement faire avec le seton comme i'ay plusieurs fois expérimenté.

De Hernie charneuse.

Definition

Hernie charneuse, que les Grecz appellent Sarcocelé est une tumeur contre nature dedans le Scrotum, laquelle est faicte d'une chair scyreuse, & quasi res-

Causes

semblante à veines variqueuses. Les causes desquelles sont abondance de grosses humeurs là amassées, qui n'ont peu estre regies des parties là cōtenues. Et ce à raison

Signes.

de leur debilité. Les signes de hernie charneuse sont durté ineguale, & inflation qui demeure tousiours en la partie à sauoir au didime, & croist tousiours avec douleur le plus souuent sans estre vnue. Guidon dit ceste

ceste espece & la variqueuse estre fort
dangereuse. Toutefois i en ay pensé de tous
les deux, & principalemēt de la charneu-
se. Premieremēt que de mettre les mains
a l'œuure, il faut taster au haut du scrotum ^{Cure}
sion trouuera le didime fort deslie, & s'il
n'a point de ceste chair superflue. Car si d'a-
uenture on en trouuoit tousiours & qu'on
trouuast au plus haut du didime tousiours
de ceste tumeur, il ne faudroit entrepren-
dre l'œuure, car on n'en pourroit venir a
son honneur qu'avec grande difficulté &
danger de mort. Mais si en tastāt au haut
du didime on peut trouuer la fin de ladicte
chair, il faut proceder cōme sensuit. Ayāt
couppe le scrotum il faut lier le didime au
dessus de la chair superflue, mesmes le plus
haut qu'on pourra. Puis le couper & cau-
terizer, & proceder comme a este dit de
hernie intestinale en toute la chair super-
flue. Mais si d'auenture ladicte chair estoit
adherente au scrotum, comme le plus sou-
uent il arriue aux grandes hernies char-
neuses,

neuses, il vaut mieux partir l'œuvre en deux fois, en liant seulement le didime la première fois fort estroit a fin de faire perdre le sentiment desdictes parties, en le coupant & cauterizant. Puis quelques iours apres descharner ladicte chair d'avec le scrotum. Et proceder comme de hernie intestinale. Car en faisant tout a la fois on affligeroit trop le patient. Il y a assez grande abondance de sanie, par quoy la playe n'est pas si tost consolidee comme de Enterocelé.

Il ne sera impertinent de raconter quelques
 Histoires histoires de ces hernies charneuses. Je fus une fois appelé à Pontarly en Bourgonne d'un marchand appelé Pierre Quedance, qui avoit une hernie fort grande, toutesfois on pouvoit facilement trouver la fin. Neantmoins il eut crainte de la faire couper, & m'en retournay. Et fit venir un medecin qui y fit appliquer des corrosifz pour faire manger la chair, mais ilz n'y firent rien, combien qu'ilz y fussent appliquez par l'espace de six semaines. Par quoy il
 me ren

me renuoya chercher, mais ie ny voulu point
mettre la main: car elle auoit tant chemi-
né qu'on n'en pouuoit trouuer la fin ny trou-
uer le didime deslié, mesmes elle auoit ia cor-
rumpu la chair de mirach. qui fut cause
qu'il mourust bien tost apres. I'en ay veu
un autre qui auoit esté couppé d'un mai-
stre fort expert, qui neantmoins auoit laisse
quelque portion de chair laquelle creust
merueilleusement & en beaucoup moins
de temps que l'autre fois. Estant doncques
appellé avec des medecins & chirurgiens,
nous aduisames qu'il failloit que ie le cou-
passe encore une fois plus haut ou autre-
ment qu'il s'en alloit mourir. Ce que ie fis
ayant protesté du dangier. Or l'ayant coup-
pe, nous estimions tous qu'il estoit guarý. &
mesme le patient quelques iours s'en trou-
uoit mieux, mais la chair recreust petit a
petit, à cause que nous n'auions peu couper
toute la chair qui estoit corrumpe. iusques
au peritoine. Parquoy le patient mourut.
I'ay bien voulu briuevement. & comme en

E

passant alleguer ces histoires, pour donner a entendre que si on ne coupe le didime beaucoup au dessus de la chair superflue on pert sa peine.

De Hernie Variqueuse.

Definition

Hernie variqueuse est une apparoissance de veines non accoustumee es testicules, & autres parties contenues de-

Causes

dans le scrotum, lesquelles sont causees a raison de grosses humeurs la amassees, comme est le sang melancolique. Et ce a cause

Signes

de la debilité du lieu. Les signes sont, repletion de veines tortues en maniere de septz de vigne, & molitude des testicules ou di-

Cure

dime. Il faut proceder en la curation en ceste sorte: A pres auoir fait bonne ouuerture en long au scrotum du milieu d'en haut, il faut tirer fort le didime par le testicule. Et alors passer par dessous la varice (le plus haut qu'il sera possible) une aiguille d'argent ou autre, qui soit courbee & enfilee, & la lier en deux lieux aupres l'un de l'autre

de l'autre. S'il y a plusieurs veines, il faut faire le semblable a toutes. Mais premiere ment que d'estraindre le fil, il faut couper la varice entre les deux filz, & laisser euacuer le sang contenu en icelles: celui qui est en la partie superieure, assez peu. mais celui qui est en la partie inferieure on le peut tout euacuer en leuant le testicule en haut. Et alors on estraindra les filetz, & cauterizera-on si on veut: car il n'est pas autrement necessaire. Il faut laisser les bouts des fils asses longs, & proceder a la cure de la playe comme a este dit au parauant. Si par ce moyen il ne pouuoit guarir, ou qu'il y eut grande douleur, il faudroit couper le didyme. Et y proceder comme a este monstre de hernie intestinale. le meilleur est de les guerir par medecines resolutives, si l'ont peut.

De Hernie uenteuse.

Hernie uenteuse est tumeur de la Definition
 bourse engendree des ventosites. Et Cause
 se fait a cause de la chaleur imbecille des

Signes parties. On la cognoit à raison que le plus
souuent la bourse & la verge deuiennent
enflez & reluisent comme un miroir. La
tumeur vient soudainement, & est ronde
& ligiere, moyennāt qu'il ny ait point d'hu-
Cure meur adioint. Quand a la cure il faut u-
ser de medicamens carnificatifz cōme scit
oleum nucum, oleum anethinum, costi-
num, &c. en y adioustant, qui voudra, des
semences ou herbes carnificatiues, cōme se-
men anisi, carui, fœnicui, agni casti, ruta,
calamenta, organi, &c.

De Hernie humorale.

Definition **H**Ernie humorale est apostume conte-
nue en la bourse laquelle est engen-
dree des humeurs chaudes & froides, ne
declinans pas beaucoup de naturalité. Elle
p ut estre entre le scrotum & dartos. ou en-
tre heritroides & dartos, ou audehors de
heritroides. Les causes, les signes & la cu-
Causes
Signes &
curation ration soit semblables aux autres aposte-
mes. Parquoy au commencement il faut se
donner

Donner garde qu'elle ne s'augmente par diversions de toutes sortes, & defensifz appliquez tant sur la partie que aux parties circonuoisines par ou ledit humeur peut tomber, comme au bas de l'eschine, au perineon & autres semblables. Si la tumeur est desia toute faicte, il faut essayer à la resoudre, ou bien à la suppurer, si la matiere estoit tant rebelle qu'on ne la peut resoudre. Puis faut l'ouurir en la partie la plus decliue, si l'humeur est entre le scrotum & les tuniques du didime, on vn petit dessus le testicule si ledit humeur est contenu entre dartos & heritroides, se gardant tousiours de blesser les testicules. Nature le plus souuēt les resoult.

De la Pierre en la Vessie.

IE parleray seulement de la pierre contenue en la Vessie, laquelle s'y engendre, ou prend son origine es reins le plus souuent & descend par les vaisseaux vrectaires en ladicte Vessie. Les causes materielles

Causes

sont grosses humeurs visqueuses & terre-
 stres assemblees par assiduelles crudites. La
 cause efficiente est la chaleur excessive de
 la partie laquelle resoult le plus subtil & hu-
 mide, tant qu'il ne demeure que le plus ter-
 restre, cōme il aduient aux tuiles & vais-
 seaux faicts d'argille ainsi qu'enseigne Ga-
 lien. La cause coadiutrice est l'angustie des
 voyes. Car quād les cōduicts sont estroicts,
 les excrement qui sont gros, & visqueux
 ny peuuent passer facilement, mais s'amas-
 sent les uns sur les autres. La pierre aux
 enfans le plus souuēt s'engendre en la ves-
 sie, à cause qu'ilz ont les parties fort molles
 qui s'elargissent facilement quand les excre-
 mens passent par là loinct aussi qu'ilz ont
 la vertu expulsive fort robuste, laquelle ie-
 tte le plus loing qu'elle peut les gros excre-
 mens, lesquelz s'accumulent plus souuent
 aux enfans, qu'en ceux qui sont plus aagez.
 Car ilz sont plus gourmands, & usent d'ex-
 ercice en temps non commode, comme in-
 continent apres le repas. Les signes sont
 qu'ilz

Cause des
 pierres aux
 enfans

Signes

qu'ilz sentent une pesanteur au penil, & au perineon, avec douleur laquelle s'estend iusques a la teste de la verge, en telle sorte qu'ilz veulent tousiours la froter, & le plus souuent l'ont roide. Ilz ont souuent desir d'uriner, & s'efforcent, mais ilz rendēt l'urine goutte à goutte, & en urinant ilz sentent grande douleur qui les incite à croiser les iambes. Leur urine deuant la generation de la pierre est grosse & visqueuse comme crachat, puis selon que la pierre se faict, elle deuient plus claire, tant qu'à la fin elle sort aucunesfois sans sedimēt, au regard du commencement. Premieremēt que d'en seigner la maniere de tirer la pierre, ie monſtreray à subuenir aux accidens qui suruiennent a icelles. Et principalemēt a la suppression d'urine, laquelle se faict en tel cas. Quand la pierre est si petite qu'elle entre dedans le col de la vessie, ou qu'elle s'appuye en telle sorte qu'elle bouche tout le conduit. Car aucunesfois l'opportunité ne s'adde point de faire l'incision. pour ce que le pa

Suppres-
sion d'urine

Cure

tient ne le veut pas, ou pourtant qu'il est trop debile: combien qu'il est necessaire qu'il urine. En tel cas il faut faire fometations dessus le penil & au perineon qui ayēt vertu de relaxer lesdictes parties, cōme avec decoction de testes & intestins de monton avec mauues & guimaues & leur racine & avec racine de lis, semence de lin & de fenugrec, fleurs de camomille & de melilot, ou faire des baings ou infusions de mesme faculté: puis mettre les iambes plus haut que la teste, & les secourre a fin de reculer la pierre du col de la vessie. Et si par ce moyen on ne la pouuoit reculer, il faut mettre les doigts dedans le fondement & la repousser vers le fond de la vessie: ou mettre l'algalie oincte avec huile ou beurre frais par dedans la verge, en mettant dedans l'algalie un fillet d'argēt, crainte que quelque grosse humeur ou sang ne se mette en l'algalie. Et par ainsi empesche l'urine de sortir. Mais pource que chacun n'est pas stylé a la mener comme il appartient, mesmes


L'algalie &
la maniere
de la con-
duire

mes ceux qui ont long temps exercé l'art. Je
diray comme il faut la conduire. Apres l'a
voir courbée, il la faut mettre par dessus l'ai
ne dedans la verge & la pousser tout dou
cement iusques a tant qu'on trouue resistan
ce & lors il faut mener la verge cōtre bas:
puis passer encore l'algalie iusques a tant
qu'elle soit paruenue a la pierre laquelle e
stant repoussée du col de la vésie, faut tirer
le fil d'argent dehors l'algalie, & lors l'u
rine pourra sortir, ou bien la mettre a l'op
posite a sauoir le courbé de vers le bas ius
ques a ce que la pointe sera au col de la ves
sie, puis la tourner doucement vers l'aine
& la pincer encores en tirant la verge en
bas iusques quelle soit au vuide. Si on n'e
stoit stylé a l'algalie, on pourra auoir un fil
de plomb de la grosseur de l'algalie, en l'oin
gnant, & le mettant cōme auons dict. Car
il pourra passer facilement par le conduit
en se ployāt selon iceluy. On peut vser aussi
d'une chādelle de cire qui soit fort longue,
& deliée, en l'oingnant comme à este dit.

E s

Et se faut garder en faisant toutes ces choses (&) principalemēt en mettant l'algalie) de faire excoriation au col de la vesse. Car il est fort dangereux. Parquoy ie conseille à un chacun de ne s'en mesler, s'il n'est bien exercé, ou bien d'user des moyēs les moins dangereux.


Algalie ou Sonde.



*Si par cas fortuit la pierre estoit entre lo-
risce de la vesse & la verge, il se faut gar-
der*

der de la repousser en arriere, ains la mener plus tost avec les doigts iusques à la Verge ayant premier fomenté ces parties avec de coctions d'herbes dessus dictes. Et quād elle sera paruenue iusque à la verge si on ne la pouuoit mener plus outre (cōbien qu'il faudroit qu'elle fust assez grosse) il faut lier la verge au dessus de la pierre, de pour quelle ne retourne. Puis essayer à la rompre avec une petite tariere propre à cela, laquelle nous auons icy figuree.

Canule de la Tariere. Tariere.



Ou avec un autre ferrement ou faire
ouuerture en long dessus la pierre au coste
de la verge, & non audessous. Car la playe
seroit trop difficile à consolider a cause que
la partie est plus nerueuse, & que l'urine
en passant se mettroit entre le leures de la
playe & empescheroit la cōsolidation. Cela
faict, conuient recoudre la playe (si meslier
est) en y mettant les apparei:z comme à
este dit aux hernies. Il aduient quelque fois
que la pierre est atachee au plushaut de la
vesie ou la partie interieure enuelouppee
d'une cyste adherant a la vesie bien fort:
tellement que lon diroit que cest comme la
membrane de la vesie: car combien que
l'algalie ou autre instrument la toucheroyt
on n'empourroyt iuger vrayement si cest
pierre ou non, a cause de sa couuerture ou
cyste. Aussi peut aduenir que la pierre
estant engendree aux roignons & par la
vertu expultrice enuoyee en la vesie
pas les vretes qui veulent entrer de-
dans icelle est retenue entre les deux mem-
branes

branes de quoy la vefsie est compofee & aufi a caufe de l'imbecillite des rognons & de la vertu ou de la groffeur de la pierre & la s'adhere & croift & femble quelle ayt un cyfte apart (ce que peut auoir). Et par ce moyen peut empfcher l'vrine de entrer en la vefsie qui eft caufe de grans inconueniens. & encores quelles foyent là atachees ie croy bien que ne laiffent pas de venir empescher & eftoupper le conduit ou orifice de la vefsie & empescher l'urine de fortir & cest a caufe que la vefsie a fa plus haute partie n'eft point liee ains faict une reflection en bas: aufi a caufe de la violence & irritation de la vertu expultrice pour quoy fi l'on peut auoir cognoiffance de telles chofes vaut mieux les laiffer que les entreprendre. Dauantage ilz ont telz fignes que celles qui font en leur liberte en la vefsie: hors mis que ne font pas telle douleur a la pointe de la verge pource que ne peut causer vlcere au col de la vefsie voyant quelle eft couuerte de fon cyfte

cyste. Car si lon les vouloyt tirer faudroit arracher la vésie ou pour le moins faire grande violence que le plus souuēt la mort s'en suyuroyt.

La cure par manuelle operation ou incision.

La cure de
la pierre

IE poursuyray la methode en l'extra-
ction de la pierre laquelle iay obseruē icy
deuant, à sauoir d'enseigner premierement
la methode de laquelle iay autrefois use,
et de laquelle on use communement. Puis
de monstrier que l'experience m'a enseignē
estre beaucoup meilleur. Premierement
que cōmencer l'ouure il est bon d'euacuer le
corps s'il est cacochime ou replet, puis deux
ou trois iours apres (car il se faut donner
garde de faire l'incision le lendemain de la
medecine) il faudra proceder en ceste sor-
te. Il faut faire sauter le patient deux ou
trois saux pour faire descendre la pierre
plus bas. Et l'ayant mis contre quelque liēt,
table ou banc, ou comme i'ay faict autrefois

en

en une eschelle en y mettāt un trauersier
ou coussin ou chose semblable (combien que
l'echelle donne grande apprehension) &
luy faut leuer les genoux contre mont, &
les luy eslargir le plus qu'il sera possible,
mesmes que deux personnes les tiennent,
un de chacun costé. Et pour plus grande
seurté il est bon de les lier avec une bande
ou chose semblable, en la passant par derrie
re le col, & attachant lex deux bouts un
petit au dessus de la cheuille du pied. Cela
faict, il faut amener la pierre vers le col
de la vessie, ou lon doit faire l'incision le
plus bas que lon pourra en mettāt les doigts
de la main gauche (si tu es dextrier) bien
auant dedans le fondemēt, en les graissant
premierement de quelque chose unctueuse
& en pressant l'autre main d'ehaut en bas
le petit ventre, & ce faire ayder par un
seruiteur à mener la pierre en bas. Mais il
faut mettre dessous les mains chacun une
poignee d'estoupes ou de linge, ou autre chose
molle, crainte qu'il n'aduienne quelque in-
flam


flammation aux muscles de l'epigastie. Ce qui leur aduient souuentefois & neantmoins elle est plus à craindre que l'incision. Parquoy on se doit bien garder de commencer l'ouure apres auoir fort comprimé le ventre. Or l'ayant amenee au col de la vesse, il la faut tenir la suiecte: car aucune fois elle retourne d'une violence merueilleuse, de sorte qu'on a bien à faire de la tenir bas. Cela fait, il faut faire l'incisiõ entre le fondemēt & les testicules deux ou trois doigts loing du siege, un ou deux doigts à costé de la commissure de perincon. Car il se faut bien garder de faire l'incision dessus ladicte commissure du perineon ny trop pres d'icelle, pour les inconueniens qui s'ensuyuent & faut que l'incision soit faicte au costé gauche de la commissure, si on est dextrier: ou au dextre, si on est gauché. Le rasoir duquel on besoigne doit estre fort trenchant de la poincte, & petit. Et sera meilleur qu'il coupe de deux costez. Et le faut trainer en couppant doucement, iusques

ques à ce qu'on soit à la pierre sur laquelle on coupera le col de la vessie à fin de ne faire l'ouverture plus grande que la pierre: en se donnant garde de couper trop haut vers la capacité de la vessie. car le lieu est fort membraneux, tellement qu'il ne pourroit se consolider, & par consequent pisseroit-on tousiours par la playe. Il faut aussi se donner garde de couper l'intestin droict: car à raison de tant d'effors qu'on faict à tirer la pierre, il se redouble aucune fois, & par ainsi pouroit estre coupe. Ce qui seroit cause que la matiere fecale sortiroit par la voye de l'urine, & l'urine pareillement par le fondement, ou tous deux par les deux conduictz. Et quelque fois ne se consolide point. Il se faut donc garder de passer le rasoir par derriere la pierre, ou au coste, ou par trop dessoubz vers les doigts qui sont au fondement. Ayant donc faict l'incision de mesme, conuient tirer la pierre avec les tenailles, ou avec le crochet lequel est fort en usage & propre pour ceste facon.

F

lequel nous auons icy figuré.

Crochetz.



*Si la playe estoit fort grande, on pour-
roit faire un poinct d'aiguille comme Gui-
don l'enseigne: cōbien que ie n'en ay iamais
cousu: car il est expedient que la sanie s'eva-
cue. Aussi que les labres se reunissent faci-
lement à raison quelles sont tousiours assez
cōioinctes, & aucune fois trop, tant qu'elles
empesc*

empeschent que le sang ne se peut euacuer,
ains si endercit *et* coagule en telle sorte
qu'il empeche l'urine de sortir par la playe
et par la Verge comme sera dit. Et quel-
que fois est mestier y mettre une tente, la-
quelle ie conseille estre percee a ce quelle
n'empesche l'urine de sortir. Il ne faut o-
mettre commēt aucune fois il y a plusieurs
pierres toute à la fois en la vésie. Ce qu'on
cognoit a ce qu'en ayant ia tiré une la dou-
leur neantmoins continue comme au par-
auant. Et les autres signes de pierre y sont.
Aussi on le cognoist facilement a la pierre
pource quelle est plus vaine d'un couste
que d'autre à cause du frotemēt des pierres
qui ce faict le plus souuent quand descen-
dent ensemble en l'orifice de la vésie ou au-
trement. Le plus souuent elles se viennent
rendre d'elles mesme a la playe par ou a
este tiree la premiere. Et adonc il est facile
les tirer. Mais si d'elles mesmes elles ne se
presentoyent, il faut user des moyens qu'a
uons dict icy deuant pour les y amener. Et

Plusieurs
pierres en
la vésie

ne faut craindre de comprimer mediocrement le petit ventre: car il ny a plus danger d'inflātion, pource que les muscles sont destendus. Ce que i'ay souuent experimenté. S'il arriuoit suppression d'urine à raison de quelque trombus, ou sang coagulé, ou autre matiere visqueuse (ainsi que i'ay veu souuente fois) il faudroit passer le crochet par la playe, & le desrompre en le tirant hors s'il est possible, ou bien y passer l'algalie ou par la verge, comme a esté dict.

Contre do
leur qui sur
uent a la
vesie


Si ayant tiré la pierre, il suruenoit douleur en la vesie, ou en son col, il sera bon d'y seringuer des iniections contraires a la cause de la douleur: comme si elle prouenoit de quelque excoriation laissée par la pierre, il faudroit y seringuer du lait nouvellement traict, ou du lait clair, ou decoctions d'orge. Et si la douleur prouenoit a cause de quelque inflātion, on pourra faire iniection de decoction de mauues, violettes, roses, camomilles, & choses semblables en y adioustant qui voudra, d'huile violat, rosat, de nim

de nimphea, de scorpions, & choses semblables. Et si la douleur venoit a cause de quelque pierre laquelle on n'osast encore tirer, il seroit bon de faire iniection de sang de bouc tué nouvellement. Car avec ce qu'il sede la douleur, il a faculté de rompre la pierre. Cela faict, il faut proceder a la guaison de la playe comme auons enseigné aux Hernies.

Autre maniere de tirer la Pierre
avec les tenailles, qu'on dict la
Grosse fermente.

IL conuient auoir une canule d'argent Grosse
fermente
ou de leton, laquelle soit de la figure de l'algalie, excepté qu'elle est ouuerte au dehors et assez large: affin que le rasoir y puisse entrer, ainsi que la voyez icy figuree.

TRAITE DE
Canule. Rasoir. Gorgeret.




Et la passant par la verge, la faut pousser, comme auons dict de l'algalie, iusques au col de la vessie, en la tournant un peu vers le costé droict pour faire l'incision droict dedans icelle. Puis faire l'incision au lieu qu'auons dict cy deuant en couppant avec le rasoir le col de la vessie, iusques à ce qu'on soit dedans la cavitè de la canule. Et alors en trainant le rasoir par dedans la-
dicte

dictē cavitē faut faire assez bonne ouuerture vers la capacité de la vésie, selon que la pierre est grosse. Cela faict, il fault oster le rasoir, & aller trouver la canule avec le gorgeret, & en mettant sa poincte dedās la canule, & le poussant iusques dedans la vésie. Et adonc on tirera la canule, & mettra on les tenailles, qu'on appelle la grosse fermente, dedans le gorgeret: Et par la cavitē d'iceluy on les poussera iusques a la capacité de la vésie. Et puis on tirera le gorgeret, & maniera-on les tenailles iusques à tant qu'on cognoistra la pierre estre dedans. Et a ceste heure la faut tenir ferme en la tirant avec la plus grande dextérité que faire ce pourra. puis proceder au reste comme a esté dit au chapitre precedent. I'ay inuētē des tenailles desquelles ie baille cy deffous la figure, lesquelles sont fort propres. Car encore quelles s'elargissent fort par deuant, neantmoins elles demeurent estroictes auderriere, en telle sorte quelles ne font point d'oppression à la chair car

elles ne la dilattent point trop. Et par ainsi
 il nest pas besoin de faire si grande ouuerture
 re cōme quand on use des autres tenailles.
 9 Ceste facon toutesfois de tirer la pierre me
 semble fort dangereuse. Car il faut faire grā
 de ouuerture & seroit meilleur le faire en
 deux fois, comme dirons au chapitre suy-
 uant avec l'ayde de Dieu.

Tenailles.



Autre

Autre façon de tirer la pierre meilleure sans comparaison que nulle autre, d'autant qu'elle est sans peril & grand douleur, inuentee par l'auteur.

A Pres auoir preparé le patient, il faut faire l'incision dessus la canule ainsi qu'auons enseigné cy deuant. Puis faut mettre les restraintsz dessus la playe sans rien toucher à la pierre pour ceste fois, si d'auenture d'elle mesme elle ne se presentoit a la playe. Puis quelque iour apres quand on cognoistra le patient estre en bonne disposition, & sans fieure (laquelle ne luy aduiendra moyennant qu'il tiēne bonne diete) il faut tirer la pierre, la quelle quelque fois d'elle mesme se presente a la playe comme i'ay souuente fois experimenté. Et si elle ne se presentoit, il la faut faire descendre en mettant la main par le fondement, & comprimant le petit ventre cōme a aste dict, Et ne faut craindre alors de le comprimer moderement: car les parties sont desten-


F s

dues a raison que l'urine s'est tousiours
 euacuee, & le patient à usé de bonne die-
 te. Ayant donc amene la pierre au col
 de la vessie, il la faut tirer avec tenailles
 ou crochets, comme a esté dict. Si la pierre
 estoit tant grosse qu'elle ne peut passer par
 le col de la vessie, il se faut bien garder de
 couper la vessie au lieu membraneux, car
 il est dangereux, & mortel le plus souvent:
 Ioinct que la playe ne se peut consolider.
 Mais il faut auoir des tenailles incisives
 cy dessous figurees, lesquelles sont fort pro-
 pres moyennant quelles soyent bien
 aguisee, & assez fortes: &
 rompre la pierre dedans la
 vessie à une ou a plu-
 sieurs fois, selon la
 disposition du
 patient.



Tena

Tenailles incisives.



Il est beaucoup plus expedient de la rompre ainsi que de la laisser en faisant tousiours languir le patient, comme autre fois i'ay faiët deuant qu'auoir inuenté ceste methode, craignant que le patient mourust entre mes mains i'ose bien dire. que les liures ny les hommes ne m'ont point enseigné ceste methode de laisser ainsi son patient en repos quatre, ou cinq iours ou plus

ou plus apres auoir faiçt l'incision, mais l'ex-
perience maistrresse de toutes choses me la
monstre : car il m'est quelque fois aduenu
qu'ayāt tiré une pierre, mon patient estoit
tant debile que ie n'osoye entreprendre de
presser le petit ventre pour voir s'il y en
reſtoit, de pour qu'il ne mourut entre mes
mains. Mais ayant mis les reſtraintifz des-
sus le laiſſoy là iusques à ce qu'il fust r'enfor-
cé & en y retournant ie trouuois quelque
fois que la pierre d'elle meſme s'estoit ren-
due a la playe, quand elle estoit petite, ou
bien ſouuent ſortie dehors. Et ſi elle ne s'e-
ſtoit preſentee ie la y faiſois deſcendre faci-
lement en mettant les mains par le fonde-
ment, & en comprimant le petit ventre
comme a eſte dict. Quelque fois ie penſois
eſtre reſolu qu'il ny en auoit plus, neant-
moins aubout de quelques iours i'experi-
mentay le contraire a raiſon de la douleur
qu'il ſentoit comme au parauant, & des
autres ſignes que nous auons ia dictz. Par-
ainſi i'eſtoy contreint pour mon honneur
de la

de la tirer. ce que ie faisois plus aysement
qu'a la premiere fois & sans grande dou-
leur au patient. Dont i'ay colligé ceste me-
thode cōtenue en ce chapitre. Qui est apres
auoir faict l'incision de ne tirer la pierre
tout a la fois si d'elle mesme elle ne se pre-
sentoit. Il m'est aduenu vne fois que ie vou-
lois tirer la pierre a vn enfant de dix ans Histoire
ou enuiron, mais pour tous mes efforts ia-
mais ne peu la mener bas. Voyant cela, &
que le patient estoit fort presse, d'auantage
que les parens desirans qu'il mourust plus
tost que de viure en tel trauail. Aussi que ie
ne vouloy pas qu'il me fust reproche de ne
l'auoir peu tirer, combien que c'estoit à moy
folie, ie deliberay de couper la vesse sur
le penil vn peu à coste. Ce que ie fis en la
coupant sur la pierre en leuant la pierre
auec mes doigts que i'auois mis par le fon-
dement & en la tenant subiecte auec les
mains d'un seruiteur qui comprimoit le
petit ventre, & par ce moyen ie la tiray.
Ladicte pierre estoit de la grosseur d'un
oeuf.

*oeuf. Et neantmoins la playe se consolida,
 et fut guari. Combien que ie ne conseille
 d'ainsi faire: ains plustost d'vser du moyen
 par nous inuenté du quel auons parlé icy
 deuant.*

*La maniere de tirer la Pierre
 aux femmes.*


*I*L est facile à cognoistre si les femmes
 ont pierre, ou non: car outre les signes de
 uant dictz en mettant le doigtz par le col
 de la matrice, on trouue facilement s'il y a
 rien en la vessie qui est audessus, Et n'est dif-
 ficile de la mener au col de la vessie, moyen-
 nant qu'elle ne soit trop grosse. Quāt à la cu-
 ration i'ay tousiours de coustume les couper
 au costé du col de la vessie ou se viēt ren-
 dre le col de la matrice: puis procede au re-
 ste, cōme i'ay monstré cy dessus a l'extraction
 de la pierre des hommes, cest a sauoir en fai-
 sant descendre la pierre iusques au col de la
 vessie & la tirant avec crochetz ou te-
 nailles, ne plus ne moins qu'auons dict des
 hommes.

Cure

hommes. Ou si elle estoit trop grosse, la rompre avec tenailles incisives qui soyent fort sutes (Car si elles estoient grosses elles feroient oppression aux muscles qui empesche que l'urine ne sorte si non volontaiement) en les ouurant selon que la pierre est grosse, & les tirant tout droict & tout a un coup: se donnant diligemment garde de couper le corps de la vésie. Je trouue ceste procedure beaucoup meilleure que celle de laquelle aucuns usent, lesquelz ont un dilatoire comme un speculum matricis, & le passent par le cōduit de la vésie iusques à ce qu'ilz soyent en la capacité dicelle. Là ou ilz vont prendre la pierre. Et pour ce faire, ilz dilatent tant lesdictes parties qu'il rompent les fibres du muscle qui retient l'urine, de sorte que toute leur vie l'urine sorte sans leur cōgé. Ce qui est fort facheux: combien qu'il est plus supportable que d'auoir tousiours la pierre. Il faut proceder a la cure de la playe comme a esté dict cy deuant. Toutesfois considere que le col de la vésie

4 Vessie des femmes est plus court & plus large que celui des hommes, si la pierre n'est point plus grosse qu'une noix muscade, ou qu'une amande, on la pourra facilement tirer par le col de la Vessie sans faire incision en le dilatant avec un speculum tel qu'il est cy figuré.

Speculum.



Et passant par iceluy des tenailles incisives fort deliees, ou bien une tariere (telle que

que l'auons figuree) *et* la tirāt avec icelles. Et n'ya pas danger qu'elle se rompe: car par ce moyen elle sort plus facilement. Or cependant qu'on faiēt l'operation il faut tenir la pierre par derriere avec les doigtz qu'on passera par le col de la matrice: de peur qu'elle ne recule, *et* pour la tenir plus ferme contre l'instrument. Et ce faiēt, on usera d'iniectiōs mitigatiues de douleur pour empescher l'inflammation.

De la cure de Cataracte.

Cataracte n'est autre chose qu'une Definition
tache ou macule dedans la prunelle, qui empesche la v̄ue. Elle est entre la tunique cornee *et* l'humeur cristalin dedans l'humeur aqueux. Les latins l'appellent *Suffusio*, combien que cōmunément elle n'est point dictē Cataracte si la suffusion n'est Causes
desia consommee. Les causes conioinctes *et* prochaines sont humeurs contenuz entre la tunique cornee *et* l'humeur cristalin lesquels se condensent: comme nous voyons

G

en la generation de la glace. Ces humeurs sont aucunes fois enuoyes des autres parties, comme du Vêtricule, ou de la teste. aucune fois aussi ilz sont amassez des excremens des humeurs de l'oeil, & principalemēt de l'humeur albugineux. Ce qu'on cognoit par la douleur des parties dessus dictes. Car si on sent douleur en l'estomach, & que la veue des deux yeux soit empeschee, & qu'on se trouue mieux des yeux une fois que l'autre, aussi qu'on ait esté long temps sans voir rien de nebuleux dedans loil, cest adire que ces humeurs la sont enuoyees de l'estomach. Pareillement faut il iuger de la teste: car si lon y a senty grand mal au parauant: ou qu'on luy sente encore, ou bien que l'imagination soit interessée, ou les autres facultez animales, c'est signe que lesdictes humeurs sont descenduz de la teste. Ainsi peut on
Signes iuger des autres parties. Les signes de Cataracte peuent estre colligez de la definition dessus dictē: car on voit une tache dedans la prunelle ou derriere, laquelle quelque fois est

est blanche, aucune fois noire, ou de couleur celeste, ou cendree, ou autre selon l'humeur qui y est. La veue aucune fois est totallemēt empeschee, comme quand l'humeur est fort gros & espais: quelque fois les choses apparoissent d'autre couleur qu'elles ne sont, aucune fois elle n'occupe qu'une partie de la prunelle & lors les choses qu'on voit semblent estre percees: quelque fois elle cōtient toute la prunelle, & beaucoup d'avantage, combien qu'on n'en voit sinon ce qui est contenu derriere la prunelle: car les tuniques de l'oeil & autre lieux ne sont transparentes. Deuant que venir a la curation manuelle, il faut bien aduiser si la Cataracte est faicte par le consentement des autres parties ou non: car si elle estoit faicte par la communication d'une autre partie que de l'oeil, il faudroit premierement donner ordre à la guarison d'icelle partie, ou autrement ce seroit tousiours à recommencer. Il faut aussi regarder si elle est apte pour estre abbatue avec l'aguille: Car quand elle est

Cure

H 2

noire, ou citrine de laquelle la pupille est toute remplie, elle n'est pas bonne a abbatre, ny pareillement celle qui est faicte de cause externe comme de cheute ou coups. Car encore qu'elle fust abbatue, on n'y verroit goutte, ou bien peu, veu que les esprits & humeurs se sont resoultz. Aussi quand elle est trop tendre l'aguille passe a trauers comme a trauers de l'eau sans la pouuoir abbatre. Pareillement quand elle est trop dure & trop vieille elle est fort difficile a estre abbatue: combien que i'en ay abbatu qui estoient fort endurcies, & quasi estoient come corne de lanterne. Et faisoient du bruit en les abbaissant comme si on eust rompu du papier. Vn bon maistre en vient quasi tousiours a bout. Car encore qu'il en demeure quelque petite portion qui ne puisse estre abbatue, nature la consumera facilement. Il est besoing aussi de preñdre garde si le nerf optique est point oppilé: car pour neant osteroit on la Cataracte s'il y auoit oppilation audict nerf: car aussi bien n'y verroit on rien

Oppilation
du nerf
optique

rien. On cognoistra les choses dessus dictes par les signes qui s'ensuiuent, si lon frotte la Cataracte avec les doigts ou chose semblable, en fermant l'autre oeil *et* quelle s'elargissent sans puis apres se r'assembler *et* qu'on voye encore les choses presentees cest signe que la Cataracte est trop tendre pour estre abbaissee avec l'aguiille. Au contraire quand elle est eschauffee en la frottant, comme a este dit, ou la soufflant en fermant l'autre oeil, *et* qu'elle ne se dilate point, *et* est fort blanche, *et* que les formes des choses visibles ne puissent estre transportees par icelle a l'humeur cristalin, c'est signe qu'elle est fort dure *et* grandement facheuse a oster. Et ne faut iuger de la durté *et* tendresse d'icelles par la longueur ou briefueté du temps qu'elles sont comencees: car on en trouue aucunes fois qui ne sont que de six ou sept mois qui sont plus meures que telle qui est de cinq ou six ans. Ceux qui ne sont fort experts en l'art s'abusent bien souuent pensant qu'elle est trop tendre, *et* neantmoins

Signes

elle est assez dure. On cognoistra y auoir obstruction au nerf optique quand l'oeil ne s'enfle point en fermant l'autre, ou bien quand la Cataracte ne se dilate point ny par frottemēt, ne par insufflation en fermant l'autre oeil, ou quand l'oil est beau & que lon ny voyt rien a lors est appellee goutte serene qui est obstruction aux nerfz optiques. La Cataracte est idoine pour estre abbatue, laquelle est de la couleur de l'air ou celestine, grise ou cendree, non pas trop blanche, laquelle par frottement ou chose semblable se dilate, puis se r'assemble & voyent aucune ment comme la clarté ou chose semblable. Deuant que commencer l'œuure il sera bon que le patient soit purgé par le cōseil du medecin. Quand ie n'ay la commodité d'vser du cōseil du medecin, i'vse de la purge qui s'ensuit. Reci. aqua betonica lib. unā, aqua faeniculi & ruta ana unc. iij. in quibus dissolue oximell. squil. quart i. syr. de sthoec. & mellis ros. coll. unc. ij. misce, fiat inlep. pro quatuor dosibus. Reci. pillularum cocchicorum

Purgation

rum & lucis maioris ana drach.ß. cum
aqua ruta fiant pill. sex capiat post primum
somnum cum cuspodia. Il faut qu'il soit aussi
priué de toute passion. puis le matin en ieun,
environ trois heures de soleil la lune décrois-
sante (si la commodité s'adonne) faut le fai-
re asseoir sur un banc qui soit assez estroict
en le cheuauchant. Et qu'il soit en un lieu
mediocrement clair, car la trop grãde clar-
té rend les yeux du patiēt par trop luy sans.
Ce qui nuit grandement au maistre (cōme
l'experience le monstre) Puis on luy bende-
ra l'oil sain avec du cotton dessus, ou autre
chose suauue pour empescher son mouuemēt
durant l'operation. Cela faict, le maistre
s'asserra deuant luy un peu plus haut en
luy faisant mettre les mains sur ses ge-
noux. Vn homme sera derriere qui luy tiē-
dra la teste ferme, alors ce pendant que
quelcun polira l'aguille en la passant souuēt
parmy quelque accoustrement, le maistre
machera du cloux de girofle, ou du zingem-
bre, ou autre chose forte & luy soufflera

Cure


H 4

trois ou quatre fois dedans l'oeil malade
pour l'eschauffer & le preparer. Puis en le
faisant regarder vers son nez mettra les
doigts sur l'oeil malade pour le tenir fer-
me iusques à ce qu'il ait planté l'aguille des-
sus la conionctiue deuers le petit angle assez
prez du noir de l'oeil. Car tant plus on s'ap-
proche d'iceluy tant moins les tuniques sont
espoisses & faut transpercer les tuniques
tout droict en virant l'aguille sans
aucune crainte & poussant
assez fort iusques a tant
qu'on soit au vui-
de se gardant
diligem-
ment
de percer les veines
de la conion-
ctiue.

::

Aiguil

Aiguilles.



Ayant donc transpercé toutes les tuniques iusques au vuide. Lors il faut tourner la poincte de l'aiguille vers la Cataracte entre icelle & la partie de cornee qui est deuant la prunelle. Et faut pousser ladicte aiguille iusques a ce quelle ait presque tout passé ladicte prunelle. Ce qu'on pourra facilement voir a l'oeil: car on verra l'aiguille par dessus la Cataracte & lors on

G s

doit prendre la Cataracte par le milieu en la poussant un peu dedans l'oil pour la mieux prendre avec l'aguille, non pas trop aussi, de pour des humeurs & la faut mener au bas de l'oeil toute entiere s'il est possible: car c'est le plus seur s'il est fait cōme il appartient. Estant ainsi abbaissee, la y faut tenir suiecte l'espace de dire l'oraison dominicale deux ou trois fois, ou plus comme on cognoistra estre expedient. Puis tirer l'aguille en haut petit a petit en la tournoyant non point toutesfois du tout hors de l'oeil, a cause que si elle remontoit, pource qu'on ne la tient plus suiecte, il faudroit repousser l'aguille pour la rabatre. Ou si elle remontoit, ne faut se laisser de la rabatre tousiours & a la morfondre iusques a tant qu'elle y demeure: se gardant toutesfois de l'elargissement d'ueue, & de blesser l'humeur cristalin & encore que la Cataracte en la baissant deuienne comme lait, ou eau trouble, pource n'est pas du pire. Car puis apres elle ne peut se reunir & l'oeil vient a s'eclaircir.

cir. Et quand elle se rompt, faut abbatre toutes les pieces l'une apres l'autre. Et encore qu'il en demourast quelque piece, ne faut douter quelle ne se cōsomme & perde. S'il aduient qu'on ne la puisse mener au bas de l'oeil pour batre qu'on face, il faut la mener en haut comme i'ay faict plusieurs fois, & sont bien guariz: car elles s'y consomment aussi bien qu'au bas de l'oeil. Combien, à cause de la pesanteur, qu'elle retourne plus aysement dedans la prunelle. Ayant donc mis la Cataracte au lieu qu'auons dict, & y estant arrestee il faut retirer l'aguille en haut tout doucement crainte qu'on ne retirast ou retournaist la Cataracte dedans la prunelle. Et la faut sortir en virant, cōme quand on la faict entrer. Puis faut mettre un blanc d'œuf batu avec d'eau rose dessus l'oeil & quelque defensif dessus le front en laissant le premier appareil par l'espace de deux ou trois iours, moyennant qu'il ny suruienne douleur. Puis on pourra leur remuer deux fois le iour. Il faut aussi bender l'oeil
sain

*sain comme l'autre. Car quand l'un se re-
mue, l'autre sen sent. Durant ce temps il
Diette faut se garder des choses trop chaudes, va-
poreuses, de mauuaise digestion, comme de
toutes espisseries. salures, d'aux, doignons, &
moustarde de vin puissant, fricassée, pain
mal cuit & mal leué, comme de bressez &
choses semblables. Il faut qu'il remue les
mandibules le moins qu'il pourra. Et pour
tant qu'il se garde de parler fort, & man-
ger choses dures, ains plus tost de choses mol-
les & sorbilles comme potage au mouton,
ou avec poulailles, de l'orge mundé, du gru
d'auoine, du pain cuit avec beurre ou huile,
quelque petit vin: qu'il soit soingneux d'a-
uoir bon ventre, toutesfois sans s'efforcer,
se tienne la teste bien haute dedans son lict.
S'il luy suruenoit douleur de teste, il y fau-
droit donner ordre par le conseil de quelque
medecin, ou en son absence luy ouurir la ce-
phalique si rien n'y repugne. Il aduient au-
cune fois que la Cataracte remonte bien tost
apres qu'on l'a abbatue. Et alors enuiron
sept*

Sept ou huiſt iours il faut la rabatre comme auons monſtré, pourueu que le patient n'ait point douleur de teſte. Et faut paſſer l'aiguille par vn autre pertuis, ou bien par l'autre ia faiſt, combien qu'il eſt plus douloureux. Ayant demouré en la ſorte deſſus dicté par l'eſpace de huiſt ou neuf iours, il faut le debender en luy lauât l'oeil avec d'eau froide, en ſe gardant toutes ſois pour quelques iours de regarder trop la clarté, ains pluſ toſt qu'il mette quelque choſe deuant ſes yeux, cōme vne piece de drap, ou taſſettas verd, ou noir, ou bleu, ou lunettes qui s'atachent par derriere leſquelles ſont fort propres, ou choſe ſemblable, iuſques a ce qu'il puiſſe bien porter la clarté ſans douleur. Sans touteſois faire comme au paſſé, a ſauoir de fermer toutes leſ fenēſtres & portes, tellement que le patient n'auoit d'air. Et leſ tenoyent ſi chaudz qu'ilz leur cauſoyent le pluſ ſouuent vne ſieure. Car quand ilz ſont bien bandez & cōpetēment couuertz, il n'eſt ia beſoing de leſ tenir ſi ſerrez.

De

De Vngula.

I' Ay bien voulu icy toucher de la cure d'ungula, à cause que gens de nostre art en font profession: lesquelz seront soulagez de peine de le chercher en d'autres liures.

Definition Ungula est une excrescense de chair particulière, ou nerueuse commençant à un des angles de l'oeil ou a tous deux, ou en une partie de la conionctive: laquelle s'estend quelque fois iusques a la prunelle quelque fois couure toute la conionctive, le plus souvent elle viēt du grād angle de l'oeil qui est vers le nez, plus raremēt se trouue au petit angle, & encore moins souuēt es autres parties de la conionctive. Aucuns diuisent les ungules en ungules charneuses, & nerueuses, en comprenant deffous la nerueuse la lippeuse, laquelle proprement est de l'espece de macule, & est blanche cōme nege. La nerueuse est subtile, semblable au peritoine. On pourroit bien diuiser les ungules selon la diuersite des couleurs, & des autres accidens. Car les unes sont rouges, les autres

autres citrines, les autres brunes tirant a la blancheur, les autres blanches. Aucunes sont nouvelles: lesquelles facilement sont arrachees. Les autres sont vieilles & dures: lesquelles sont arrachees à grande difficulté. Les causes desquelles sont gros humeurs Causes visqueux engendrez de mauvais regime, & amassez au lieu dessus dict à raison de la debilité des parties. Les signes peuent estre Signes colligez des choses susdictes. La cure se peut Cure faire par medecine tant prises au dedans, que appliquees par dehors, ou par chirurgie. Les medecines prises par dedans sont semblables à celles de Cataractes: car il faut purger le gros humeur qui cause ceste chair superflue par le conseil du medecin. Quant aux medicamens qu'on applique par dehors ilz doivent estre desiccatifz & corrosifz. Et affin qu'ilz facent mieux leur operation, il faut premier que de les appliquer faire une somtation remolitue & rarefactiue, comme avec vapeur ou d'eau tiede en y cuisant (si lon veut) des mauues, de semmen


mence de fenugrec, des fleurs de melilot, camomille ou leur semblables. On pourra appliquer le colier qui s'ensuit, ou le semblable.

Recipe aris vsti calchitidis et fellis hirci ana part. equales, misce fiat collirium. En y mellant un peu de miel il n'en sera que meilleur. Idem Recipe seduegi loti, aris vsti, cadmie argenti, salis Indi: boracis, viridis aris, piperis longi ana unc. ss. piperis nigri et albi, et spuma maris ana unc. j. aloes suc. citr. gariofi. spic. nard. ana dra. iiij. ss. zinzib. belletz ana drac. ij. pul. ut alcohol, per cribrum transmittatur, ac cum vino albo et aqua fœniculi fiat collirium, utatur ut dictum est. Le trouue la cure facile faicte par operation manuelle et meilleure, moyennant qu'elle soit proprement faicte comme il appartient. Et se peut faire en deux sortes. La premiere se faict comme sensuit. Ayant ouuert les paupieres il faut avec un crochet ou deux ou trois s'il est besoing suspendre par le milieu l'ungula et

Cure

Et la tirer vers soy tout doucement.

Crochetz. Aiguille.



Puis passer entre icelle & la conionctiue une lancette, ou une esquille de tuyau de plume bien futile, en faisant un trou, si mestier est, pour la passer. Et avec icelle la descharner, & separer ligierement d'avec la conionctiue. Et quand elle sera separee, on la couppera avec forcettes se gardant touf-

H

iours de faire dommage aux tuniques des yeux, & principalement a la cornee, ny pareillement a la chair du lachrimal : car si elle estoit coupee, les larmes tomberoyent tousiours par la malgré qu'on en eust. L'ayant donc coupee, on machera du sel & du cumin, & le mettra-on dedās l'oeil de paour que la paupiere ne se prenne avec l'oeil. Et pour ceste mesme raison, il faut qu'il remue souuēt l'oeil, & dorme peu iusques a ce qu'il soit cicatrizé. Dessus l'oeil pour empescher l'inflammation, & pour mitiguer la douleur on mettra un blanc d'oeuf batu avec d'huile, ou quelque cau refrigerante, comme eau rose, en le remuant deux fois le iour. S'il estoit demouré : quelque portion d'ungula, il la faudroit consumer avec les colires dessus dictz : car autrement elle pourroit reuenir. L'autre maniere n'est pas grandement differente de celle que venons de bailler, sinon qu'au lieu de descharner avec la plume ou la lancette, on descharne avec de la saye de queue de che-
ual

Autre cure

ual en suspendant l'ungula avec crochets comme a este dict, ou avec un fil passe en une aiguille. Puis passant ladicte saye entre l'ungula & la conionctive il faut la prendre par les deux bouts, & separer l'ungula tout doucement en commenceant premierement vers la prunelle, puis vers le lachrimal, & proceder au reste comme auons desia monstre.

Des bouches ou leures fendues de natiuité, ou autrement.

Les leures fendues sont aucunes fois de natiuité, & ce par le defect de nature. Quelque fois elle sont telles par accident qu'il leur aduient. D'auantage elles sont aucunes fois fendues sans que la machoir ou palais soit fendu, aucunes fois il est fendu quelque peu, & quelque fois il est fendu aussi long & large que la leure. Toutes peuuent estre guaries, combien que celles qui ont le palais interesse soyent guaries a plus grande difficulté. Neautmoins qu'aucune gens

sont de ceste opinion que puis que Dieu les
a donnees de natiuité, quelles ne peuuent estre
guaries. Qui est vne opinion non seulement
plus que treslourde mais heretique, comme
dict Guidon. Yen ay guari plusieurs par
l'ayde du Seigneur: par quoy ie monstrey
la maniere comment il y faut proceder. Il
Cure faut coupper avec raisoir, ou forsettes, ou
avec cauteris actuelz toute la peau de de-
dans les leures qu'on veut conioindre en-
semble. Puis mettre dessus des restraints
pour oster la douleur, & les laisser vn ou
deux iours. Et si lon y besoigne avec le cau-
tere, apres auoir mis les restraints il fau-
dra faire tomber l'escarre avec du beurre
frais ou chose semblable premier que de
proceder plus outre. Car autrement ce seroit
perdre sa peine le plus souvent, & molester
son patient pour neant, principalement
quand les leures sont bien loing l'vne de
l'autre. Cela faict il faut donner ordre de
conioindre les leures ensemble de telle sorte
qu'il ny ait partie de l'vne qui ne touche
l'au-

l'autre. Ce que lon peut faire en deux sortes
l'une avec des aiguilles cōme ie monstrey
cy apres, & l'autre avec des pieces de drap
de figure triangulaire, & de grandeur cōpe
tente selon le personnage. Qui est la plus pro
pre, & avec moindre douleur, & moins de
cicatrice. Ce qui est fort desirable en ces par
ties la, singulieremēt quand c'est une fille.
Il faut appliquer sur lesdictes pieces de l'em
plastre qui sensuit:

Recipe pul. sang. drac. turis masth. farine
volatil. molend. picis ana partes equales,
incorporentur cum albuminibus ouorum,
& soit fait en mode d'emplastre qui sera
estēdu sur lesdictes pieces de drap, lesquelles
on appliquera sur les leures l'une a un co
ste, & l'autre a l'autre en laissant de distan
ce entre icelles enuiron un doigt apres l'es
carre estre tombe. Et faut les laisser secher
a fin quelles tiennent plus ferme. Et estant
sechees on les coudra l'une avec l'autre en
tirāt les poinctz iusques a ce que les leures
s'entre touchent en aydant avec la main a

Autre cure

les approcher, ou avec des coussinets s'il est
besoing, lesquelz nous descrirōs cy apres. L'autre
sorte de tenir les leures cōioinctes ensemble
est faicte cōme a este dit avec des aguilles,
lesquelles il faut passer avec le canō a coudre
s'il est besoing par le dessus d'une des
leures en la perceant tout a trauers, & cō-
prenant assez bōne quātité de chair. Puis la
repasser tout a trauers de l'autre en cōmen-
cant au dessous. On en peut mettre deux ou
trois selon qu'il sera expediēt. Et faut quelles
soyēt enfilees de filet lōg pour faire deux ou
trois tours autour d'elles & non plus de
paour que labondance du fil n'empeschast
l'onguēt qu'on applique pour glutiner de par-
uenir aux leures. Il faut aussi que les leures
s'entre touchēt de toutes parts. Et pour ce
faire il faudra user des coussinets comme
nous dirōs. Aucune fois quelles sont trop ten-
dues, & les aguilles couppēt la chair, et les
leures s'esloingnēt l'une de l'autre. Lors il
faut les recōioindre cōme au parauāt. Si les
leures estoient tant distantes l'une de l'autre
tre

tre comme i'ay veu plusieurs fois, qu'on ne peut les assembler, il faut les couper au dedans en long & de trauers en assez bonne suffisance, moyennāt qu'on ne coupe point la peau, & par ce moyen elles s'allongeront facilement, ainsi que plusieurs fois i'ay fait. Les cousins qu'on applique pour tenir les leures vnies, sont faitz en ceste sorte. Il faut auoir deux petites pieces de bois de forme quarree, lesquelles ayent un doigt d'espois, deux doigts de large ou enuiron, selon la personne, & longues selon la leure fendue, lesquelles soyent garnies tout alentour de linge fort delié. Et les faut mettre dessus les deux ioues l'une en chacun coste au droit des leures fendues en les cousant par derriere avec une coeffe qui vienne iusques au milieu de la ioue, ou avec une bande qui soit autant large comme les pieces sont longues en la passant par derriere le col, & dessous les oreilles en amenant les deux boutz iusques au milieu de la ioue comme a este dict de la coeffe. Puis auoir une

autre bende qui soit attachee a la premiere par les deux bouts dessus les oreilles en la passant par dessus la teste. Cela faict, il faut mettre derriere lesdicts coussins deux bastons l'un a chacun costé, lesquels soyent d'un doigt de large & d'un pied de long, ou environ, selon le personnage: & soyent garnis tout a l'entour & principalement au-dessous) d'estoupes ou d'autre choses semblables, & attachees ensemble par les deux bouts en faisant l'une des ligatures dessus le menton & l'autre dessus le front, en estreignant assez fort affin que les bastons poussent les coussinets en avant, & les coussinets la chair. Et que par ce moyen les leures se tiennent mieux conioinctes ensemble. Il les faut laisser iusques a ce que la consolidation soit faicte. Et moyennant qu'ilz soyent faicts come il appartient, c'est une chose fort propre & singuliere. Deuant que de mettre les restreintifz dessus les leures pour les glutiner ensemble, il faut y mettre un linge mouillé en oxycraton, & dessus y mettre les

les reſtraintifz. Car autrement les reſtrain
tifz ſe prendroyent aux aiguilles.

Des dents de lieure.

IL y a une autre maniere de leures fen
dues qu'on appelle cōmunement dent de Dent de
lieure
lieure à raiſon qu'au deuant de la mādibule
il y a des dents qui ſortēt hors de la bouche
& aucunefois une ſeulement, le plus ſou
uent deux. Et quelque fois d'avantage, ac
compaignees de la mandibule, laquelle eſt
fendue des deux coſtez. Quant eſt de la me Cure
thode curative, elle eſt ſemblable à celle qui
a eſtē baillēe cy deuant, hors mis que quād
leſdictes dents ou mādibules ſont ſi grādes
qu'elles ne peuvent eſtre couuertes, il ny a
point de danger de couper le ſuperflu avec
tenailles incifives, ou avec une petite ſie laiſ
ſant la chair qui eſt deſſus icelles ſ'il y en a
competement: car on pourra coudre avec
icelle les leures l'une en chacun coſte. Et
ſ'il y avoit telle diſtāce entre les dictes leu
ers, qu'on ne peut les aſſembler, il faudroit

H s

Histoire
notable

user des dissections en la bouche comme à
 este dict, en procedant au residu en la cure
 comme auons monstree cy dessus. Il ma sem-
 ble bon a ce propos d'adiouster en ce liure
 une histoire, affin que si le semblable ad-
 uenoit a ceux a qui ce liure s'adresse qu'ilz
 ne craignent y mettre la main pour les se-
 courir en telle necessite. Un certain perso-
 nage nomme Jacques Ianot de Sauagny pres
 de neufchastel sur le lac en suysse eut un ca-
 tarre qui luy descedit en la ioue. Et ny eut
 ordre que ledict catarre ne vint a s'estio-
 mener & corrompre tellement la partie,
 que la ioue tombast, au moins la plus gran-
 de partie & de la mandibule de dessoubz &
 dessus, & fust pense long tēps d'un chirur-
 gien lequel ny peut rien faire sinon l'incar-
 ner. Or ledict ulcere estoit grand, & print
 bort à l'environ, & estoit ronde de sorte
 qu'un oeuf d'oye y eust passe. Dont les deux
 mandibules estoient desnuees de chair, &
 ny auoit point de dents de ce coste. Il falloit
 que cest homme portast une bende de cuir
 &

Et autres choses pour empescher qu'en
 mangeant la viande ne se perdit, cōbien
 que pour cela il ne peut empescher qu'il ne
 sortist tousiours quelque chose du boire &
 du manger. Parquoy ne s'osoit trouuer en
 bonne compagnie d'autāt que la salive cou-
 loit tousiours par la, & estoit en grand pei-
 ne de boire & manger. Aussi pour ce que
 la bēde estoit attachee sur la teste assez fer-
 me elle l'empeschoit d'ouurir la bouche, &
 demoura en ceste sorte l'espace de sept ou
 huiēt ans. Ayant beaucoup cherché & en plu-
 sieurs lieux pour y remedier, il ne trouua
 aucun qu'y voulut mettre la main, ains luy
 donnoyent a entēdre qu'il estoit incurable:
 car on n'y pouuoit engendrer chair ny ap-
 procher les labies par ce que le pertuis estoit
 rond & grand. Il aduint que ie pensois là
 aupres des hernies & bouches fendues, &
 pierres. Voyāt ces cures, & principalemēt
 des bouches fendues, il me vint parler &
 monſtrer sa maladie. L'ayāt bien aduisee,
 luy dis que ie le guariroy aydāt nostre Sei-
 gneur.

gneur. Alors il me dict qu'il l'auoit monstre
a plusieurs maistres *et* que i'aduissasse bien
deuant qu'y mettre la main. Ce à quoy ie
m'accorday, ne luy demādant rien que pre
mierement ne fust guaray. Pour *venir* à la
Cure cure. Ie fis situer le patient cōtre un aix à
demy droict, *et* luy attachay les cuisses con
tre ledict aix sans autre chose. Ie conseille
toutcfois de les bien attacher. Et auois mes
cauterres au feu tous prés dedans un bassin
et braise pour m'en seruir puis apres. A
lors ie prins un petit rasoir ou escalepelle
et coupis le bort ou cuir tout a lenuiron : a
pres ie fendis la peau contre l'oreille *et* cō
tre l'oeil, *et* contre la mādibule inferieure,
tant que ie cogneu estre expedient, en gar
dant tousiours de couper par trop auant
pour ne faire plus grād dommage à la par
tie, *et* de ne couper les muscles de trauers.
Puis couppis au dedans la chair tout a len
tour contre l'oreille *et* l'oeil, bref tout à
lentour tant que ie peu, encore les labies ne
se pouuoient assembler. Adonc ie couppis
la

la chair de rechef au dedans de trauers & de long en deschiuetant, me gardant toutesfois que ne vintse au dehors: car il ne falloit point couper le cuir. Et quād il y auoit flux, ou quelque veine qui fluoit, ie la cauterizois avec les cauterres susdits. Et ainsi alongis mes pieces ou labies, et furēt assemblees. Là ou i appliquay incontinant sept aiguilles enfilees comme a esté monstre es leures fendues: Et au bout de quatre ou cinq iours en tomberēt trois, & n'y en fallut mettre d'autres pource que les labies tyroyent. Or i'usay de compresses ou coussinets avec batons & bandes tout alentour pour faire venir la chair de toutes parts à la partie comme auons dict des leures fendues, affin que la chair ne se rompist, & les aiguilles ne tombassent. Car sans grande violēce, & moyen de mener la chair ou cuir au lieu, ie n'eusse rien aduancé. Je mis aussi un linge mouillé en oxycraton dessus, & puis mes restraintifz a ce qu'ilz ne se prinsent contre les aiguilles: & le guaray en ceste sorte dedans quatorze iours.

4 iours. Aucuns disoyent que la ioue tireroit
et qu'il ne pourroit ouurir la bouche, mais
la chair y abondast autant qu'il fut besoing,
et a mis barbe dessus tellement qu'il se co-
gnoit bien peu.

De la maniere d'extirper une
iambe ou bras.


DEuant que de venir a l'extirpation
de quelque membre, il faut bien ad-
uiser s'il seroit possible d'y remedier par au-
tre moyen, et de n'ensuyre ceux qui sans
esgard incontinent veulēt tout passer, cōme
lon dict, par le feu et le fer. Or si lon voit
qu'on ny puisse autrement donner ordre, il
vaut beaucoup mieux perdre un membre
que tout le corps, ainsi comme dict Albu-
crasis. Pour venir a la cure ayant preparé
le patient selon qu'on voit estre expediēt,
et principalement l'ayant coroboré par
choses cordialles tant prises par dedans
qu'appliquees par dehors, cōme luy ayant
baillé a boire deuant l'operation, et incon-
tinent

tinent apres l'operation, si mestier est une
 drachme de teriac avec d'eau de fleur de
 buglosse & de bourrage, ou bien luy baillant
 des sirops cordiaux, come sirop rosat de bu-
 glose pareillement conservees de roses. Et ce
 tant pour la resolution des esprits, que pour
 les vapeurs qui sont comuniquées aux par-
 ties nobles. Et est bon d'en user aussi quel-
 ques iours apres l'operatiō. Il est requis aussi
 appliquer sur le cueur l'epithime qui sensuit.
 Recipe aque ros. & buglo. ana vnc. iij. aceti
 squill. drac. vj. mithridatij et theriacæ ana
 dra. ij. s. troch. de caphura scrup. ij. dra. ij. triū
 flo. cordial. comuniū pult. ana pugil. ij. croci
 scrupul. s. misceantur, & soit appliquee sou-
 uent dessus le cueur avec une piece de scar-
 late en le faisant premier tiedir. Et faut
 qu'il soit couché dessus un banc en luy atta-
 chant. Et que le membre qui doit estre oste
 passe le bout du banc. Et qu'il y ait des che-
 uilles de ca & de la le mēbre estant lie con-
 tre le banc faut faire une ligature deux ou
 trois doigts au dessus d'ou lon veut faire l'in-
 cision.

cision. Et faut qu'elle soit assez estreinte pour empescher le mcuragie, Et pour hebe-
ter le sentiment du membre durant l'ope-
ration. Alors on marquera avec d'encre
ou chose semblable tout a l'entour le lieu ou
on doit faire l'incision. Laquelle doit estre
faicte au lieu sain. Puis on aura un rasoir
qui sera lie avec son manche pour estre plus
ferme, et le mettra on dessus le mēbre qui
doit estre coupe, cōme si on vouloit l'em-
brasser: et cōmencera on le plus haut qu'on
pourra, et en suyuant la marque faicte on
coupera tout d'une venue la chair ius-
ques a l'os sans y retourner, et la tirera on
de dessus l'os contre mont a l'entour avec des
bendes ou choses semblables affin de scier
l'os plus haut de paour qu'il ne soit trop long
quand la chair sera retiree et consolidee.
Et adonc on sciera ledict os en deux ou trois
coups le plus pres de la chair saine qu'il sera
possible. Et faut qu'un seruiteur tienne le
membre de paour qu'en tombant il ne fust
quelque escaille au mēbre sain. Et ne faut pas
le te

le tenir esleué trop, haut affin qu'il n'empêche la scie de passer. Au lieu de couper la chair avec le rasoir, on le pourra faire avec cauterres actuelz qui sont de figure de faucille ou de demy cercle comme il est icy figuré.

Cousteau à demy faucille, Scie, Cautere.



Ce que ie trouue bon: car outre ce qu'on n'a que faire de tirer la chair de dessus l'os contre mont, d'autāt que le feu le faict assez

retirer, il n'y a point tant de danger d'hémorragie cōme avec le rasoir. Apres auoir donc scié l'os il est bon de laisser sortir le sang suffisamment: affin que s'il estoit demouré quelques reliques de sang corrompu, il soit euacué, & que la partie soit soulagée & desechée & s'il ne vouloit sortir, il faudroit eslargir la ligature. Ayant fait cela, on appliquera des cauterés actuelz dessus la chair & dessus l'os, affin d'arrestér le sang et de corrobore la partie en la desechât. Puis on appliquera l'appareil qui sensuit pour appaiser la douleur en ostât la qualité laissée par le feu.

Recipe boli armeni ꝯnc. viij. terra sigill. ꝯnc. iij. albu. ouorum nu. vij. olei ros. ꝯnc. iij. aqua plantag. ꝯnc. ij. aceti ꝯnc. iij. incorporentur omnia simul, fiat linimentum.

Et soit appliqué avec estoupes trempées en vinaigre. Et s'il est besoing on en pourra mettre deux l'un sur l'autre. Et pour tenir plus ferme ie mets par dessus une emplastre de poix estendue sur la peau qui com-
prent

prent tout la partie. Car le sang ne peut passer outre la peau ains se coagule. Puis ie bende tout ensemble, & le laisse ainsi deux ou troisiours, moyennant qu'il ne survienne quelque grand douleur, ou autre accident. Et cela faict ie procure la cheute de l'escarre: & s'il est besoing ie mondifie, incarne, & cicatrize avec les remedes dicts au chapitre des hernies.

Des excrescences flegmatiques, que les gens de nostre art appellent communement luppies.

QUand i'auray baillé la methode curative des abscez flegmatiques, que le vulgaire des chirurgiens appellent excrescences flegmatiques, ie mettray fin à ce present traité. Et n'ay delibere de disputer autrement de lessence d'iceux, sinon en tant quelles pourroyent diversifier la cure. Je ne m'arresteray point aussi de bailler la cure d'un chacun en particulier, de paour (cōme lon dict) de rechanter une mesme

Absez flegmatiques
ou luppies

chanſon. Or la methode de les guarir n'eſt grandement differente ſinon en quelques poincts cōme on verra cy apres. Je ne preten auſſi en baillāt la methode curatiue des dictſ abſces d'entendre d'un chacun: mais ſeulement de ceux qu'entreprenēt à guarir les gens de noſtre art comme ſont atheroma, Steathoma, meliceris, luppie, & nodus. Leſquelz gens de noſtre art appellent tous luppies, ignorans leurs propres noms. Car comme i ay promis icy deuant, ie ne veu rien eſcrire que ie n'ay experimētē. Atheroma eſt vne tumeur contenue en vne membrane ou cysſis, lequel eſt ſans douleur, & de meſme couleur que la partie la ou il eſt contenāt en ſoy vne humeur viſqueux ſemblable à bouillie, de laquelle il a pris ſon nom. Icelle tumeur le plus ſouuēt eſt longue. Et n'eſt beaucoup eſleuee, ny ſenfouce incontinent qu'on la preſſe, & ſe releue fort lentement. Ce qui ſe faiēt a cauſe de l'humeur qui eſt grandement viſqueux.

Atheroma

Meliceris

Meliceris eſt vne tumeur ſans douleur
con

contenue dedans un cystis comme la precedente, laquelle cõtient une humeur qui ressemble à miel, laquelle est assez liquide. Ce qui cause qu'elle est ronde, & qu'elle s'enfoncé facilement & se releue incontinent.

Steathoma est une tumeur assez dure de mesme couleur que la partie ou elle est, enue loppée d'une tunique membraneuse cõme les precedentes. Laquelle encore quelle soit fort pressée, ne s'enfoncé point. Et contient une humeur semblable à suif. Il n'est difficile de colliger la difference de ces trois tumeurs par les descriptions dessus dictes: Car entant que Atheroma & Meliceris s'enfonsent quãd on les presse, elles sont differētes de Steathoma qui ne s'enfoncé point: Et Meliceris differe de Atheroma à cause quil s'enfonse & releue facilement, ce que Atheroma faiçt a grãde difficulte. Il y a d'autres tumeurs contre nature lesquelles sont cõprises soubz cer espèces cõme Testudo ou Talpa, Napta ou nata lesquelz noms ne se trouuent point es anciens medecins, ains seule-

Steathoma

Testudo
Napta

Definition
de testudo

ment es modernes. Testudo, ainsi qu'aucuns chirurgiens le definissent, est une grande tumeur contre nature, molle & large, cōme une tortue de laquelle elle prent son appellation. Laquelle si elle viēt en la teste on l'appelle cōmunemēt talpa ou talparia. Et quand elle se trouue au col on la nōme Bociū ou brōcocelé et en francois le goetron. Et quand elle vient dedans le scrotum, on l'appelle hernie, il ny a aucun doute qu'elle ne soit cōprise soubz Atheroma ou melliceris: car entant qu'elle cōtient une humeur liquide, elle ressemble à mellicoris. Et entāt que l'humeur est blanc cōme bouillie, il semble qu'il est cōpris sous atheroma: Cōbien que i'estime qu'il se raporte plus tost à melliceris. Quelque fois on trouue dedans ces tumeurs des matieres estranges cōme poilz, ongle, corne, foin. Et se trouue non seulement en ceste espece, mais aussi es autres abscez dessusdict. Napta ou nata est cōprise sous Steathoma: car elle ne cede point quand on la presse. Icelle est sans douleur sinon par accident:

dent: car entant quelle est grande & pesante elle ested les muscles & pour ceste cause est douloureuse es parties circōuoisines Lup-^{Luppie} pie semble prendre son nom de loup: cōbien que ie ne vois pas grande raison de l'ethymologie. Et est vne tumeur rōde & molle qui vient cōmunemēt es lieux nerueux qui sont durs & secz On l'appelle vulgairement en francois vne Loupe. Ceste description me semble n'estre guiere differēte du Ganglion des Grecz ne de glandula d'^{Ganglion} A- uicenne, ne de nodus. Car les Grecz ou dict Ganglion estre vne cōcussion des nerfz prouenant de percussion, ou de lassitude en plusieurs des parties du corps. & principalement au carpus, & a la ioincture des piedz. Et Auicenne dict que les glandules^{Glandules} prennent leur naissance es lieux nerueux cōme en la main ou aux piedz en la partie exterieure et opposite de la paume de la main & au front. lesquelles choses iceluy mesme attribue a Nodus, & Guidon pareillemēt. Les causes primitives dessusdictes tumeurs^{Causes}

sont excez de boire & de manger, & principalement de grosses viandes qui peuvent engendrer flegmes. Et de quelque cōcussion Les causes antecedētes sont principalement l'humour flegmatique. Quant est des signes d'une chacune desdictes tumeurs on les peut facilement colliger des descriptions desdictes, quāt icelles sont mobiles & separees d'avec le cuir c'est adire quelles ont un cystis. Au cōtraire, quād elles sont stables et immobiles, cela signifie quelle sont sans cyste.

Eure Quant est de la methode curatiue ayant oste la cause antecedēte par bon regime & medecines ordōnees par le cōseil de quelque sauant medecin, il faut les guarir par medicamēs appliquez par dehors, ou les extirper par manuelle operation. S'il on voit qu'elles ne soyent point encores trop inueterrees, il faut essayer à les resoudre & dessécher par medicamēs à ce propres, cōme de ceux qui sensuyuēt. Il faut fort froter la tumeur avec la main pour l'eschauffer & remollir, puis la batre bien fort avec le fond d'une escuelle,

elle, ou avec quelque chose de bois bien solide
affin de rompre le cystis au elle est cōtenue
comme dedans une bourse. Et cela faict, il
faut lier dessus une lame de plomb, Et l'y
laisser par l'espace de huit ou dix iours. Si la
dictē lame estoit premieremēt trempee en
d'eau alumineuse de quoy parle Guidon, ou
bien qu'elle receut la vapeur d'icelle, elle se
roit de plus grāde efficace. Il est bō premiere
mēt que de mettre ladicte lame d'appliquer
une emplastre faicte avec gōme ammoniac
dissoult avec bon vinaigre en y adioustant
qui voudra du bdeliū et du galbanū autāt
des uns cōme des autres, puis mettre la la-
me dessus l'emplastre cōme a este dict. cōbien
que l'emplastre de luy mesme le pourroit re-
soudre. Celuy qui sensuit est bon, principale-
ment pour les melicerides.

Recipe Uuas passas exemptis acinis nu. 20.
squammæ eris drac. iij. subigantur simul Et
soyent appliquees apres la fomentation qui
ait vertu de remollir Et resoudre. Aetius
Use de ciclame meslé de vielle graisse de

pourceau en y adioustāt un peu de soufre.

Vn autre a ce mesme.

Recipe passull. enucleatarum lib. j. cumini minutissimé triti ꝑnc. vj. nitri ꝑnc. iij. mise en y adioustāt un peu d'huile resolutif, cōme anethinū, nucū, &c. affin de les mieux incorporer ensemble. Si l'on voit que lesd-tes tumeurs soyēt tant rebelles, qu'elles ne puissent se resoudre, & qu'elles soyent aucunement suppurees, lors il faudra les ouvrir & euacuer la matiere qui y est contenue ayant faict bonne ouuerture, & mis une tente grosse a la poincte, & les restraints pour le premier iour. puis faire manger le cystis avec medicamēs corrosifz, cōme trochisques de minio de verd de gris unguētū apostolorū, egyptiacū de chaux vine avec sauon & chose semblables: se donnant garde qu'ilz ne touchent autre chose que le cystis de peur de la douleur. Laquelle si elle suruenoit, il faudroit mitiguer avec les medicamens dessus dictz. Quād il y aura escarre illa faudra tirer petit à petit avec pincettes

ou

ou la faire tomber, comme auons ia mon-
tré, puis faire Venir la chair en procedant
au reste comme es autre Vlcères.

La curation par manuelle operation.

OR si ces tumeurs ne peuvent estre ^{Cure}
guaries par la methode dessus dicte.
il reste de les extirper par manuelle opera-
tion, mais premier que de l'entreprendre, il
faut aduiser diligemmēt qu'ilz ne soyent en
lieux dangereux, cōme aux bras, iābes, ioin-
tures & autres parties externes, ou quelles
ayēt colligāce avec grās Vaisseaux, ou nerfz
ou quelles fussent trop grandes de pour des
accidens qui sensuyuent. Ce consideré il faut
dōc faire l'incision dessus la tumeur, en long
ou obliquemēt, ou en triangle s'il est besoing
de grande ouuerture, & non de trauers de
pauor de couper les Vaisseaux ou les nerfz
en faisant asscz bonne ouuerture: principa-
lemēt si c'est en la teste. Et quād on est par-
uenue au cystis, il faut le descharner douce-
ment d'auec les parties circonuoisines avec
le ra

le rasoir, ou avec le doigt, ou avec un linge bien deslié: qui est le plus expedient. Et l'attirer avec tout son cystis. Car s'il en demourroit quelque portion il y auroit dāger qu'elle retournast. Que s'il aduenoit qu'il demourast quelque portion du cystis, il faudroit la consumer avec les medicamēs corrosifz dessus dictz. Il faut semblablement se donner garde de percer le cystis en faisant l'operation: Car par cemoien la matiere sortiroit, & seroit cause que puis apres on ne pourroit trouuer ledict cystis, cōme quād la matiere est liquide. Ayant donc extirper ladicte excrescēce, il faut mettre les restraints dessus dictz pour empescher l'hemorrhagie. Or si la tumeur estoit au visage et qu'elle fust si grande, pour euitier la suture à cause de la grāde playe qu'il faudroit faire, conseille la passer seulemēt pour la vuyder & faire consumer le cystis cōme auons dict, & principalement quand sont fillees. Et aussi quād il aduiendroit que ce seroit en lieu dangereux, cōme es parties nerueuses, & ioinctures.

res. Puis si la playe est grande on pourra la coudre en haut en laissant en bas ouuerture pour y mettre une tente, en y procedāt cōme es autres playes. Si d'auenture on auoit couppé quelque veine ou artere, & pour cela qu'on ne peust empescher l'hemorragie, avec les remedes susdictz on pourra prendre d'encens, de mastic, d'aloés, de sang de dragon de bolus armenus puluerise bien menu & de la farine qui est a lentour des molins, & avec un blanc d'oeuf & de poil de lieure bien deslié faire un onguent ou metāt le bout du doigt dessus le vaisseau iusques à tāt que l'hemorragie soit aucunemēt cessée, ou bien lier la veine ou artere avec un filet bien fort : ainsi cōme enseigne Galien au cinquiesme de sa methode. Ceste methode curatiue que ie viens d'enseigner est cōmune à toutes les tumeurs dessus dictes ainsi qu'il a este dict. Vray est qu'en la cure de Nodus il faut plus mettre de remolitifz que és autres especes. Parquoy l'onguēt qui sensuit luy sera propre.

Cure de
Nodus

Reci

Recipe adipis anatis, vulpis, & vulturis,
aut alterius avis rapacis ana ꝑnc. iij. me-
dulla cruris ceruij & vituli ana ꝑnc. ij. fa-
rina seminis foeni græci & lini ana ꝑnc. j.
ß. olei de lilio ꝑnc. v. cera lot & cū aqua vi-
ta quātum sufficit, fiat unguentū. lequel on
appliquera apres auoir fomenté la partie
avec la vapeur de bon vinaigre, dedans
lequel on aura esteinte vne pierre à feu ou
d'vne pierre de molin toute rouge. Il me
semble que le lecteur ne se faschera point si
ie raconte quelques vnes des cures des tu-
meurs dessusdictes: affin de ne tomber es in-
conueniens ou ie suis tombé, & qu'ilz soyēt
toutesfois hardis avec prudence. Je tiray
vne fois vn steathoma a vn homme qu'il
auoit entre l'oeil & l'aureille lequel estoit
fort large & peu esleué, parquoy fus con-
trainct y faire grande cuuerture, en le des-
charnant, ie couppis l'artere, qui fut cause
d'vne grande hemoragie laquelle a grand
difficulté i'arrestay: toutesfois il fut bien gua-
ry grace a dieu. Il y auoit vn autre home
qui

qui auoit une luppie au genoux laquelle
estoit plus grosse que le poing. apres l'auoir
bien consideree ie trouuay qu'elle n'auoit
point de colligāce avec l'extremite des mus-
cles & autres parties nerueuses qui passent
par là, & qu'elle estoit fort mobile, & la ti-
ray. Elle auoit au dessous cōme une corde
ou ligament par lequel elle estoit attache a
la rotule du genoux il y auoit pareillement
une femme a Orgon près d'Auignon la-
quelle auoit garde une grand' douleur en
la iambe par l'espace de dix ans sans auoir
une seule minute d'alegeance sinon ce pen-
dant qu'elle la chauffoit, combien qu'elle eut
cherche tous les moyens de se guarir qui luy
estoit possible, & qu'elle eut beaucoup des-
pē du en medecine. Moy y estant appelle, ie
voyois que la iābe malade ne differoit de
l'autre en aucune chose sinon qu'elle estoit
noire, & ce à cause qu'elle l'auoit beaucoup
chaufé. Ie la tatay asses ferme de toutes pars
avec le bout des doigts. a la fin ie trouue au
dehors d'icelle enuiron le milieu un petit
nodus

nodus de la grosseur d'une auelane fort dur lequel estoit sur los tout aupres du nerfz le quel il refroidissoit, ce qui estoit cause de la douleur. Car depuis que ie leu tiré par la methode dessusdict elle fut tresbien guarie.

Voyla amy lecteur ce que i'ay experimēté en ceste partie de chirurgie, non pas en si bon ordre cōme tu le desirerois, mais le plus fidelement que i'ay peu. Parquoy tu prendras le tout en la bonne partie, comme de celuy qui n'a pretēdu autre chose qu'à te soulager, d'autant qu'il n'y a point de liures qui contiennent a part la pratique que ie t'ay cy dessus descrite: te priant qu'il te prenne enuie d'en faire d'auantage.

F I N.

PPTES.

lane fori da

s du nesi

cause de

re par la m

guarie.

ey experim

on pas en

mai le plu

ey tu pren

omme de

la re son

liures qu

ie tary cy

ecune en

